

Ech schwätze ganz oft hei och vum Jihad islamique, deen een an där Géigend net däréf vergiessen an deen nach méi radikal ass wéi d’Hamas. Jiddwer Persoun, déi do Member gëtt, engagéiert sech hiert Liewen ze afferen, egal wéi, an op kee Fall e Fridde mat Israel ze sichen. Si accuséiere souguer d’Hamas, datt déi ze méll wier mat Israel an e Waffestëllstand akzeptéiert hätt. Dat just nëmme gesot, fir d’Ambiance e bëssen ze beschreiwen.

An deene puer Minutten, déi mer zur Verfügung stinn, wëll ech am Numm vun der ADR awer och e puer Constatatiounen a politesch Aussoe maachen. Éischtens, Gewalt engendréiert Gewalt. Dës Wourecht beweist sech all Kéier, an och an dësem Fall.

Zweetens, d’Recht vun all Stat fir sech ze verdeedegen, justifiéiert net Gewaltakten, déi gréisstendeels d’Zivilbevölkerung treffen. De Friddensprozess muss virgoen, mä et gëtt méi schwéier.

Drëttens, an Israel stinn d’Parlamentswahlen un an op palästinensescher Säit ass d’Mandat vum President Abbas um Enn, an et stinn normalerweis och do Presidentschaftswahlen un. Kee weess, wéi et do ausgeet, an ob d’Hamas net kéint eng Majoritéit kréien.

Véiertens, d’Hamas gëtt als ze méll vun de Fundamentaliste vum Jihad islamique uge-sinn, an duerfir ass esouguer en Dialog mat der Hamas kee Garant, datt et net zu eenzelne Gewaltakte kënn.

Fënneftens, déi richteg politesch Äntwert ass, datt esou séier wéi méiglech d’Schafe vun engem onofhängege Palästinenser-Stat nieft Israel Realitéit gëtt. Dee sécherste Wee géint terroristesch Gewalt vun Eenzelnen ass, datt d’Palästinenser nees valabel Zukunftsperspektive kréien, anstatt Chômage an Aarmut.

Sechstens, mir erwaarde vun Europa, datt dee franséisch-ägyptesche Plang, fir d’Grenze vu Gaza ofzesécheren an d’Populatioun mat Gidder ze versueren, déi se fir hiert aldeeglecht Liewe brauchen, an net de Waffeschmuggel, Realitéit gëtt. Mir erwaarde vun Europa, datt d’Friddensinitiativen intensivéiert ginn, an dëst am Kader vu concertéierten Aktiounen mat den anere Membere vum Quartett, der UNO, Amerika, Russland an am Dialog mat alle Länner aus der Géigend.

Siwentens, déi Televisiounsbillen an der arabischer Welt hunn op jidde Fall eppes erreecht. Dat ass, datt deen interkulturellen Dialog méi schwéier gëtt, obwuel en absolut néideg ass zwëschent dem Westen, Europa an der muslimanescher Welt. Schlëmmer ass, datt dës Billen gutt Argumenter si fir d’Extremisten an d’Fundamentalisten, deenen hiert Objektiv net de Fridden ass, mä eng kontinuierlech Eskalatioun, eng Spiral vun der Konfrontatioun.

Aachtens, mir erwaarden ons vun der Lëtzebuurger Regierung, datt se un humanitären Aktiounen am europäesche Kader participéiert. Mir erwaarden awer och, datt si bei der israelischer Regierung, zesumme mat anere Länner, déi betraff sinn, fir en Dédommagement, eng Entschiedegung antrëtt fir déi Projeten, déi am Kader vun onser Entwécklungshëllef finanzéiert goufen. Da muss Israel déi Länner an och Lëtzebuerg entschiedegen.

Néngtens - an dat ass de leschte Punkt -, am europäesche Conseil des Ministres wëllen e puer Länner Drock op Israel maachen, fir dee kommerziellen Embargo géint Gaza opzehiewen. Dëst natierlech ënnert deene Konditiounen vum franséisch-ägyptesche Plang, notament mat d’Ennerbanne vum Waffeschmuggel ugeet. Aner Länner lehnen all Drock op Israel of. Mir wéisste gär vun dëser Regierung, wat hir Haltung op dësem Punkt ass.

» M. le Président.- Den Här Jaerling kennt als leschte Riedner.

» M. Aly Jaerling (Indépendant).- Här President, erlaabt mer, dass ech ufänke mat engem Zitat vum Albert Camus: All Leed oder all Beleidigung, déi engem Mënsch, zougefügt gëtt, ass eng Erofwierdegung vun der ganzer Mënschheet. - A wa mer eist Weltbild haut kucken, da gesi mer, dass op

ville Plazen esou Erofwierdegunge geschéien. A wa mer d’Aen zoumaachen an näischt dergéint ënnerhuelen, da si mer mat schëlleg.

D’Fro, déi sech an dësem Beräich hei stellt, vun deem mer elo schwätzen, ass: Wat kënnen mer maachen, wann et op deenen zwou Säite pyroman Pompjeeë ginn, déi Bensin an dat Feier schëdden, wat se am Fong virtäusche wëllen ze läschen? Wat kënnen mer do maachen?

D’Fro, déi sech stellt, ass och d’Fro vun Europa: Wat fir eng Roll huet Europa ze spillen? Hei stellt sech effektiv eraus, dass et ganz wichteg ass, dass Europa seng institutionell Problemer léist an endlech kann aus engem Mond schwätzen, an net dass Verschiddener duerch d’Welt reesen an hir eege Geschichte verbreedden.

Wann ech da gesi wien do duerch d’Welt gereest ass, well ech hu mer jo schonn emol déi ganzen Zäit d’Fro gestallt iwwert d’Gazasträif, wou den Här Braz jo gesot huet, d’Kanner kënnen emol net an d’Mier schwamme goen, da froen ech mech: Wéi kommen déi Waffen dann do eran?

Well d’Fro vun der Waffenindustrie, déi mat dru schëlleg ass an déi mat un deem ganze Krich do verdéngt an un all Krich op der Welt, déi huet hei bis elo nach kee gestallt. D’Fro vum Fridden ass och eng Geschicht vun de Waffen. D’Fro vum Fridden ass och eng Geschicht vun der Oprüstung. Mir als Europa mussen och emol versiche bei der Oprüstungsindustrie anzegräifen an do anelenken an derfir suergen, dass déi permanent Oprüstung ophéiert.

Well déi Waffen, déi do geliwwert ginn, déi kommen net nëmmen aus Russland, aus China oder vu Kuba, déi kommen och aus der Waffenindustrie vun deene Länner, vun deenen, déi an d’Gazasträif gepilgert sinn, fir do fir Fridden ze plädéieren. Ass dat net einfach aarmséileg? An ass et net och ze verdaamen, wann een esou virugeet? Et geet een hi Fridde priedegen an et léisst ee seng eege Waffenindustrie awer ongestéiert dohinner an déi Regioun Waffe liwweren!

Dat sinn och Froen, déi Europa sech muss stellen. Dat sinn och Froen, iwwert déi mer emol eng Kéier konkret musse schwätzen. Op där enger Säit respektéiert Israel déi Grenzen net, déi scho 67 € festgeluecht ginn, op där anerer Säit ass et mat der Hamas schwéier ze verhandelen. Dat ass richteg. Mä ech verwierfe mech dergéint, dass wann d’Wuert „Hamas“ gebraucht gëtt, dass dann dat ganzt palästinensescht Vollek op eemol domadder a Verbindung bruecht gëtt.

D’Hamas ass eng extrem Organisatioun, déi am Fong näischt direkt mam palästinensesche Vollek ze dinn huet. D’palästinensescht Vollek huet menger Usicht no déi Hamas gewielt aus Protest, fir iergendwéi eng Bewegung ze hunn, fir sech no bausse bemierkbar ze maachen. Ech sinn iwwerzeegt, dass kee Palästinenser dat dote wollt; ausser natierlech déi Leit, déi schwéier gelidden hunn, déi e Familljember verluer hunn. Et kann een och nach verstoen, dass déi méi reaktionär reagéieren. Mä op jidde Fall, d’Hamas ass eng Organisatioun fir sech.

Ech nenne se och net Terroristen. Well wat ass en Terrorist? Fir mech ass en Terrorist en hondsgewéinleche Verbrieche, dee Verbrieche un der Mënschheet begeet. Mir nennen en Terrorist, well mer e fäerten. A mir hu kee Recht, fir déi ze fäerten. Mir hu just d’Flicht, fir deenen entgéintzewierken a versiche mat alle Moyenen déi Leit mat demokratesche Mëttelen ze strofen, déi se verdéngt hunn.

Fir de Fridden an deem Gebitt do ze kréien, stellt sech effektiv, wéi den Här Braz gesot huet, d’Fro: Soll ee mat der Hamas verhandelen oder net? Dat ass d’Fro. Da muss ee sech d’Fro stellen: Muss een dann awer och op där anerer Säit mat deene reaktionären an extremisteschen israelesche - Kreeser verhandelen, well déi net besser si wéi d’Hamas? Et kann een net soen, dass déi besser wiere wéi d’Hamas, well déi selwer mat deeneselwechte Gedankegang schaffe wéi déi Kriminell vun der Hamas.

Et muss een also op deenen zwou Säiten déi Extremisten emol vläicht un en Dësch kréien a kucken: Wéi kann ee mat deene verhandelen? Do huet Europa eng wichteg Roll ze spillen. Mä en Europa, vun deem ech awer dann hoffen, dass et an nächster Zukunft an där Saach kann aus engem Mond schwätzen. Well et geet do ëm Mënscheliwwen an et geet do ëm eng Geschicht, déi mat vill Blut geschriww gëtt. Europa misst do wierklech säi Pefferkär bäileeën, fir datt déi Situatioun endlech ophéiert.

Ech soen lech Merci.

» M. le Président.- Merci, Här Jaerling. Den Här Ausseminister freet d’Wuert nach eng Kéier; awer kuerz. D’Zäit vun der Regierung ass eriiwwer.

» M. Jean Asselborn, Ministre des Affaires étrangères et de l’Immigration.- Ech hunn e puer Froe gestallt kritt, Här President, an ech verschie kuerz a séier drop ze äntwerten.

Déi éischt Fro ass déi, wéi d’Europäesch Unioun opgetrueden ass. Jiddweree vun den Orateuren huet dat hei contestéiert oder kritiséiert. Et ass och richteg.

Ech hu mech den 30. Dezember zu Paräis probéiert anzesetzen, wou mer déi éischt Réunioun haten, fir ze soen: „An der Europäescher Unioun ass d’Regel: Entweder et ass d’Troika oder et sinn déi 27. Der-tëschent gëtt et näischt.“ Deemools schonn hat de President Sarkozy jo am Kapp, fir als Copresident vun der Union pour la Méditerranée bei d’FINUL ze goen, dat heescht an de Libanon ze goen.

Bon, dat ass awer nach ze akzeptéieren a mengen Aen. Herno ass d’Saach méi kritesch ginn, wéi e puer Ausseministere vun der Unioun sech um Terrain beweegt hunn a wou een net méi gewosst huet: Wou ass dann elo d’Présidence drun?

Duerfir, mir wäerten e Méindeg doudsécher ganz konkret driiwwer schwätzen, wa mer ënner eis sinn, fir dass et an Zukunft net esou ka sinn, dass wann ee grousst Land wéi Frankräich d’Présidence huet, dann ass ee President, dee geet op Moskau oder uechtert d’Welt d’Europäesch Unioun vertrieeden; a wann et méi e klengt Land ass, dann ass eng ganz Schar vun Engelcher ronderëm. Dat därft net sinn! Ech mengen, wann dat d’Astellung ass, da si mer an de Käpp am Directoire ukomm, an do musse mer eis wierklech dergéint wieren. Et ass fir doudeschts ze huelen.

Dat Zweet ass, ech wollt och dem Här Goerens vläicht äntwerten, esou gutt ech kann. Ech weess absolut net méi wéi ech et ka soen; vläicht e weénege méi, awer näischt Definitives méi. Wat ech méi weess, dat ass, dass mer effektiv d’Instrument Ägypten benotzen, fir mat der Hamas ze schwätzen; a mir net eleng, och Israel mécht dat.

Do gëtt et ee ganz bekannten an ee ganz héichkarätege Generol. Dat ass de Generol Suleiman bei den Ägypter. Dat ass deen, deen de Lien mécht mat der Hamas. De Problem mat der Hamas ass deen, dass d’Hamas ganz dacks d’zweet an d’drëtt Garde an d’Verhandlung geschéckt huet; dat heescht Leit, déi net konnten eng Décisioun huelen. D’Hamas, d’Spëtz do-vunner, de Meschal, sëtzt a Syrien. Während den Haniyeh an anerer, déi a Gaza sinn, heiansdo och ganz aner Positiounen vertrieeden.

Duerfir d’Fro, déi Europa sicht, do ass d’Debatt ze vergläichen an der Europäescher Unioun mat där Debatt, déi mer hei de Mëtteg haten. Jiddweree seet: Mir misste kënnen, awer mer wëssen net richteg wéi. Dat ass esou an dat bleift e Problem.

Ech hoffen nëmme just - an ech hunn dat net gesot -, mä dass wann den „Abu Masen“ et géif fäerdeg bréngen e Gouvernement de réconciliation op d’Been ze stellen, wann och da Leit dra sinn, déi bei der Hamas sinn, dass mer net nach eng Kéier de Feeler maachen, fir dann als Europäesch Unioun mat esou enger Regierung refuséieren ze schwätzen. Dat ass dat, wat mer mussen am Kapp hunn. Op jidde Fall, dofir wëll ech versichen ze plädéieren.

Ee leschte Punkt nach, wat ech wollt zum Här Fayot soen. Et stëmmt, dass den Här Schiltz am Numm vun der Lëtzebuurger Regierung gesot huet - an hien huet komplett Recht; hie gëtt do vu jiddwengem ënnerstëtzt -, dass mer mat där bilateraler Kooperatioun opgehalen hunn a Gaza, well dat kee Wäert méi hat. Allerdéngs, hien huet e weénege gesot: Mir kommen elo mam Scheck; mir gi Suen. Voilà! Dat huet den Här Fayot gesot.

Mir ginn net Suen a Gaza. Mir gi Suen un d’UNWRA, dat heescht un d’UNO-Organisatioun. An d’UNO-Organisatioun, dat ass déi, wou déi meeschte Länner sech elo nach eleng kënnen drop verloossen, dass déi Aiden, déi gespent ginn, och gutt ugeluecht ginn.

Da vläicht nach e Saz un den Aly Jaerling. Dir hutt gefrot: Wou kommen d’Waffen eran a Gaza? Wa mer soe Waffen, da sinn et jo virun allem déi Kassam-Rakéiten an herno Rakéiten - ech sinn elo keen Techniker -, déi bis 45 km Portée hunn. Déi Waffen - ech hunn dat versicht ze soen - kommen duerch déi 400 Tunnellen eran, déi gegruewe gi si vu Rafa ënnert der Grenz erduerch an da komme se a Gaza eraus.

Déi si jo alleguerte versicht gi futtigeschloen ze ginn. An deenen Tunnellen, soen d’israelesch Déngschter, dass do ganz vill Waffen a Rakéite stockéiert waren, déi dann elo explodéiere gedoe si ginn. Frot mech net wivill Leit dass och do hiert Liewe verluer hunn. Mä dat ass e Punkt, an et ass kloer, dat brauch een net ze verheemlechen, dass den Iran den Haaptliwwerant ass vun de Kassam-Rakéiten an och vun anere Rakéiten, déi aus Gaza geschoss ginn.

Ech hunn domadder, Här President, op déi wichtegst Fro geäntwert, déi Der mer nach gestallt hutt. Merci.

» M. le Président.- Jo? Här Goerens, wann ech gelift.

» M. Charles Goerens (DP).- Här President, ech hat den Ausseminister gefrot wéi et wier mat enger internationaler on-parteiiescher Enquêtëkommissioun iwwert d’Violation du Droit humanitaire international.

» M. Jean Asselborn, Ministre des Affaires étrangères et de l’Immigration.- Och déi Fro, Här Goerens, kënn doudsécher an eise Gespréicher op. Dir wësst, beim Georgien-Konflikt hu mer eis jo och agesat als Land fir dat fäerdeg ze bréngen. Déi Kommissioun ass elo geschafe gi mat enger Schwäizer Diplomatin un der Spëtz. Déi dote Fro kënn menger Meenung no doudsécher, wéi och déi Fro kënn iwwert d’Sanktiounen, wéi och déi Fro kënn iwwert den Upgrading vun de Relatiounen, déi d’Europäesch Unioun am Dezember mat Israel décidéiert huet.

Mir sollen elo vläicht an dëser Phas - op jidde Fall ass et meng Meenung doranner - an der Öffentlechkeet versichen net ze vill Explosives do nach mat eranzebréngen. Well dat, wat elo zielt, wat den Haaptpunkt ass, ass, dass d’Europäesch Unioun et fäerdeg bréngt de Mënschen a Gaza elo an deenen nächste Woche mat Liewensmëttel an deenen, déi nach mussen operéiert ginn, ze hëllefen, an dass mer et och iergendwéi fäerdeg bréngen, dass déi Leit en Ënnerdaach kréien.

Mä fir all déi Froen, déi Der stellt, oder déi Froen, déi Der gestallt hutt, Här Goerens, sinn ech absolut op. Ech géif mer nëmme kënnen virstellen, wann den UNO-Generalsekretär a Gaza war, an en huet gesot, dass et net tolerabel wier, dass UNO-Gebaier géife bombardéiert ginn, dass doriwwer och Enquêtë musse gemaach ginn a gekuckt muss ginn, wéi d’Responsabilitéiten do leien.

» M. le Président.- Merci, Här Ausseminister. Domadder, Dir Dammen an Dir Hären, ass dës Debatt ofgeschloss.

Mir kommen elo zum nächste Punkt vun eiem Ordre du jour. Dat ass de Projet de loi contribuant au rétablissement du plein emploi et complétant le livre V du Code du Travail par un Titre IX nouveau et l’article 631-2 du Code du Travail.

(Hilarité)

Ech wollt dat esou zitéieren, well ech kee lëtzebuergeschen Ausdrock fonnt hunn. Den Intitulé wéinstens kléngt no engem komplizéierte Projet, dee vläicht quant au fond net esou komplizéiert gëtt. Hei ass den honorabelen Här Kaes de Rapporteur. Hien huet elo d’Wuert.

» Une voix.- Wéivill Riedezäit huet hien?

» M. le Président.- Den Här Kaes huet 30 Minutten.



## 2. 5144 - Projet de loi contribuant au rétablissement du plein emploi et complétant:

### 1. le livre V du Code du Travail par un Titre IX nouveau

### 2. l’article 631-2 du Code du Travail

Rapport de la Commission du Travail et de l’Emploi

» M. Ali Kaes (CSV), rapporteur.- Här President, Här Minister, Dir Dammen an Dir Hären, de virleiende Gesetzesprojet huet als Zil e legalen a finanzielle Kader fir déi verschidde Moossnamen ze schafen, déi agesat gi fir de Chômage ze bekämpfen. Dëst soll zu enger besserer Prise en charge vun de Chômeure féieren a virun allem vun deenen, déi wäit ewech vum Aarbechtsmaart sinn an enorm Schwierigkeiten hu sech um Niveau vum Aarbechtsmaart ze integréiere respektiv ze réintegréieren. Déi



aktuell Aarbechtsinitiativ spigelt d'Evo-  
lutioun vum Chômage erëm, dat souwuel  
politesch wéi och philosophesch.

D'Form vum Chômage huet an deene  
leschte 40 Joer geännert. Vun engem  
éischter ökonomesche Chômage si mer an  
deene leschte Joren a Jorzéngten op e  
soziale Chômage iwwergaangen; och  
Chômage résiduel genannt. Dës Aarbechts-  
losegkeet profitéiert net vum wirtschaft-  
lechen Opschwong.

Si léisst sech duerch d'Inadéquatioun  
tëschent der Demande an der Offer um  
Aarbechtsmaat erklären. An anere Wieder:  
Et ginn Aarbechtsplaze geschaaft, mä net  
all Demandeur d'emploi huet déi néideg  
Kompetenzen oder Qualifikatiounen, fir  
kënnen op dese Plazen agestallt ze ginn.  
Derbäi kënnt, dass eisen Aarbechtsmaat am  
Verglach mat aneren Aarbechtsmaert  
atypesch ass. De Lëtzebuurger Aarbechts-  
maat gräift massiv op Salariéen aus der  
Grenzregioun zrëck, fir d'Besoinen un  
Aarbechtskraaft ze decken.

Eng ongenügend oder eng inadequat  
berufflech Qualifikatioun ass a bleift de  
wesentlechen Exklusiousfacteur vum Aar-  
bechtsmaat, ergo vun der sozialer Aus-  
grenzung. Ech zielen lech näischt Neies,  
wann ech soen, dass d'Aarbecht ee vun  
deene wichtigsten Integratiounsinstru-  
menter ass.

D'Tatsaach, dass dee méi wéi wahrschein-  
leche Schoss vum Chômage an deenen  
nächste Méint op eng ugespaante wirt-  
schaflech Lag zrëckzefeieren ass, wäert  
näischt dorunner änneren, dass Leit, déi  
keng oder eng ze niddreg Qualifikatioun  
hunn, et extrem schwéier wäerte kréien,  
fir eng Aarbechtsplaz ze fannen an ze be-  
halen, egal wéi ugespaant oder bléiend  
d'Wirtschaft ass.

Dës Erkenntnis huet derzou gefouert, dass  
d'Politik sech schonn zënter Jore Gedanke  
mécht, wéi een dësere Kategorie vu Leit am  
beschte kéint hëllefen, fir se nees an den  
Aarbechtsmaat anzeglidderen. Iwwert déi  
klassesch Insertiouns- a Réinsertiouns-  
instrumenter eraus hu sech lues a lues  
Moossnamen entwéckelt, déi extra op  
d'Prise en charge vu Laangzäitchômeuren  
zilen.

Nom Dépôt vum Gesetzesprojet am Joer  
2003 ass ee sech nach méi wéi virdrun der  
sozialer Dimensioun vun der struktureller  
Aarbechtslosegkeet bewosst ginn. Wa virun  
e puer Jorzéngten d'Halschent vun den Aar-  
bechtsplaze keng spezifesch Qualifikatioun  
virausgesat hunn, verlaangen hautdësdays  
méi wéi 56% vun den Aarbechtsplazen net  
nëmmen eng Qualifikatioun, mä souguer  
eng héich Qualifikatioun. D'Zuel vun den  
Aarbechtsplazen, déi eng mëttelméisseg  
Qualifikatioun verlaangen, geet stänneg  
zrëck, an d'Plazen, déi keng Qualifikatioun  
brauchen, sinn ëmmer méi eng Raritéit.  
Derbäi kënnt, dass hautdësdays souguer  
dës lescht Kategorie vun Aarbechtsplazen  
e Minimum u Qualifikatioun viraussetzt.

Et kann een also net méi wéi fréier vu Plazen  
ouni Qualifikatioun schwätzen. E Beispill:  
Et ass esou, dass een oft e Führerschäi brauch,  
fir kënnen där enger oder anerer Aarbecht  
nozegoen. Or, et gi Leit, déi dës Konditioun  
net erfëllen, sief dat aus finanziellen, ge-  
sondheetlechen oder och intellektuelle  
Grënn. Si kommen also fir eng Rei vu Plaze  
guer net a Fro. Domadder hu si reduzéiert  
Chancen, fir Aarbecht ze fannen.

Wann een d'Exigenzen um Niveau vun der  
Qualifikatioun mat den Zuele vun der  
Administration de l'emploi vergläicht, stellt  
ee fest, dass iwwert d'Halschent vun de  
Chômeure just en niddregen obligatoresche  
Schouniveau erreecht hunn. Mir stinn also  
virun enger grousser Erausfuerderung. Mir  
musse ganz kloer Léisunge fir d'Zukunft  
fannen.

Dëst setzt virus, dass een och d'Grënn vum  
soziale Chômage kennt. Déi leien nämlech  
net nëmmen an engem Mangel u Qualifi-  
katioun. De Mangel u Qualifikatioun ass oft  
nëmmen d'Spëtzt vum Äisbierg.

Wann ee sech jorelaang am Beräich vun  
den Aarbechtsinitiativen engagéiert huet a  
sech mat der Problematik befaasst huet, da  
stellt een dacks fest, dass déi Leit, déi laang  
no enger Aarbecht sichen, méi Problemer  
gläichzäiteg hunn. Ee Problem, dee ganz oft  
bei déi Mangelqualifikatioun derbäi kënnt,  
ass dee vum oft schlechte Gesondheets-  
zoustand vun der betroffener Persoun, sief  
dat psychesch wéi och kierperlech. Alkohol  
an Droge sinn dann och nach dacks am  
Spill; oft souguer kombinéiert mat engem  
labile psychesche Gesondheetszoustand  
wéi enger Depressioun.

Dëst kënnt oft doduerch, dass déi Leit  
schwéier Momenter wéi eng Trennung, en  
Doudesfall oder de Verloscht vun hirer  
fréierer Aarbechtsplaz net verkraaft hunn a

sech duerfir komplett goe loossen. Mat der  
Zäit komme familiär a finanziell Problemer  
op, eventuell eng Iwwerschëldung. Dacks  
kënne sech déi Leit och net méi eng  
adequat Wunneng leeschten, oder si  
mussen hiert Heem verkafe respektiv, wat fir  
déi betrafte Leit méi schlëmm ass,  
d'Wunneng gëtt ganz einfach versteet.

Lues a lues rutsche se an ee regelrechten  
Däiwelskrees, wou d'Problemer mat der Zäit  
zouhuelen a wou den Auswee aus deem-  
selwechten ëmmer méi schwéier gëtt. Net  
vergiessen dierf een och, dass et fir ver-  
schidde Leit duerch hir familiär Situatioun  
bal net méiglech ass, ganz einfach geregelt  
ze schaffen. Ech denken do zum Beispill un  
elengerzéiend Elteren, déi sech et net  
kënne leeschten hir Kanner versuergen ze  
loossen, wat awer Viraussetzung ass fir  
kënnen enger geregelter Aarbecht noze-  
goen. Wann da bis d'Kanner grouss sinn,  
sinn dës Leit ganz oft ze al fir den Aar-  
bechtsmaat respektiv kënnen keng beruff-  
lech Experienz während deene leschten  
zéng, 15 Joer opweisen, wat hir Chancen  
op en Job extrem reduzéiert, virun allem wa  
se och nach eng defizitär berufflech Quali-  
fikatioun hunn.

Op dëser Plaz muss een natierlech ganz  
besonnesch déi konsequent Efforten ervir-  
sträichen, déi d'Regierung zënter Laangem  
ënnerhëlt, fir dass Familijen am Allgemengen  
an d'Elengerzéiend am Besonnesche kënne  
besser hiert Familijeliewe mat hirem Beruff  
verbannen. An dëser Optik wäerten déi  
sougenannte Chèques-services, déi ab dem  
1. Mäerz vun der Familjeministeschesch  
agefouert ginn, sécherlech entscheidend  
derzou bäidroen, dass et fir eng ganz Rei vu  
Leit méi einfach wäert si fir hir Kanner  
grousszeéien a parallell einfach enger  
geregelter Aarbecht kënnen nozegoen.

E grouss Fortschrëtt an der Bekämpfung  
vum Chômage ass déi individualiséiert  
Begleedung vum Chômeur, déi d'Admi-  
nistration de l'emploi lues a lues aus-  
geschafft huet an déi de Service d'accom-  
pagnement personnalisé vun der ADEM  
géréiert. Ech erënneren lech drun, dass d'  
Noutwendegkeet vun enger individua-  
lisierter Begleedung am Kader vum PAN-  
Gesetz '99 ënnerstrach gouf an dass dës  
Moossnam zënter 2006 gesetzlech ver-  
ankert ass.

De Service d'accompagnement person-  
nalisé klasséiert d'Demandeurs d'emploi jee  
no hirer Beschäftigungsfäegkeet a ver-  
schidde Kategorien. An d'Kategorie A  
kommen d'Demandeurs d'emploi, déi ouni  
Weideres fir den Aarbechtsmaat a Fro  
kommen.

An der Kategorie B fënnt een déi De-  
mandeurs d'emploi erëm, déi zwar beruff-  
lech Kompetenzen a Qualifikatiounen op-  
weisen, déi awer net ëmmer wëssen, wéi se  
sech verkafe kënnen. Si kënnen zum  
Beispill kee korrekten CV opstellen oder  
wëssen net, wéi se sech während engem  
Bewerbungsgespräch behuele sollen.

Demandeurs d'emploi, déi an der Kategorie  
C agestuuft sinn, gehéieren zu deenen, fir  
déi Beschäftigungsprojete schonn exis-  
téieren. Déi, déi net genoe wëssen, wéi se  
mat dësem Projet ëmgoe sollen.

Demandeurs d'emploi vun de Kategorien D  
an E sinn déi Demandeurs d'emploi, déi am  
schwéierste vermëtzelbar sinn. Si stellen déi  
Kategorien duer, déi fir all Aarbechts-  
minister, fir d'ADEM, fir all Beschäftigungs-  
initiativ eng enorm Erausfuerderung sinn.  
Virun allem d'Demandeurs d'emploi vun der  
Kategorie E sinn extrem wäit ewech vum  
Aarbechtsmaat. Fir si ass eng Insertioun  
oder Réinsertioun op den Aarbechtsmaat  
leider oft eng Utopie. D'Integratiouns-  
dynamike vun dese Leit ginn duerch  
Facteure sozialer, psychologescher oder  
kierperlecher Natur, wéi ech se virdrun  
opgezielt hunn, gebremst.

De Moment si vun 12.000 Demandeurs  
d'emploi, déi beim Arbeitsamt ageschriww  
sinn, ronn 1.000 an der Kategorie A,  
tëschent 2.700 an 2.800 an der Kategorie B,  
iwwer 5.000 an der Kategorie C, 2.000 an  
der Kategorie D a ronn 1.000 an der  
Kategorie E. Dëst beweist, dass a sech en  
Drëttel vun den Demandeuren eng gutt bis  
eenegermoossen normal Viraussetzung hu  
fir kënne placéiert ze ginn, dass awer zwee  
Drëttel vun den Aarbechtssichende  
schwiereg bis extrem schwierig ze  
placéiere sinn.

Zënter 1998 hu sech Beschäftigungs-  
initiativen hei am Land entwéckelt. Dëst sinn  
zum Beispill den Objectif plein emploi, de  
ProActif oder de Forum pour l'emploi. Si  
stütze sech a sech op eng gewerkschaft-  
lech Assise. Anerer, méi klenger, awer  
dowéinst net manner wichtig, hu sech  
ënner anerem um Niveau vun de Ge-  
mengen, wéi zum Beispill Ettelbréck oder  
Diddeleng, entwéckelt. Zu de wichtigste

Beschäftigungsinitiativen, déi et hei am  
Land niewent deene gëtt, déi ech elo op-  
gezielt hunn, kann een och nach Eng nei  
Schaff, Défi-job oder Co-labor zitéieren.  
Iwwregens war Co-labor déi éischt Initiativ  
an ass schonn 1983 gegrënnt ginn.

Déi meescht Beschäftigungsinitiativen, Här  
President, Dir Dammen an Dir Härën, ginn  
iwwert de Fonds pour l'emploi cofinanzéiert,  
an zwar an der Héicht vu 75%. Et huet sech  
schnell erginn, dass de legislativen a finan-  
zielle Kader net un d'Realitéit ugepasst ass.  
Zum Beispill ass d'Fro vun der Prise en  
charge vun de Personalkäschten, déi  
d'Demandeurs d'emploi sollen enca-  
dréieren, a kengem Text geregelt. D'PAN-  
Gesetz vun '99 huet zwar preziséiert, dass  
verschidde Käschte vum Stat iwwerholl  
géife ginn, mä d'Gesetz gesäit näischt  
iwwert d'Modalitéite vun esou enger Prise  
en charge vir.

De Guide administratif et financier, dee vum  
Aarbechtsminister am Joer 2001 an d'Liewe  
geruff ginn ass, garantéiert zwar e ge-  
wëssene Grad vu finanzieller Transparenz,  
esou wéi och d'Konventiounen, déi tëschent  
dem Aarbechtsminister an de Bénéficiairë  
vun de finanzielle Mëttele vum Fonds pour  
l'emploi ënnerschriww ginn, mä dëst geet  
ganz kloer awer net duer. Eng méi déif  
gräifend Reform vun der Aarbechts- a Be-  
schäftigungspolitik ass néideg. Mooss-  
namen, déi am Kampf géint de Chômage  
agesat ginn, sollen un déi nei Realitéit  
adaptéiert ginn. Nëmmen esou kréie mir  
d'Problematik vun der Aarbechtslosegkeet  
besser an de Grëff.

Genoe dëst ass den Objektiv vum virleiende  
Gesetzesprojet. Iwwregens huet d'Gesetz  
vum 22. Dezember 2006 schonns déi eng  
oder aner Adaptatioun an eis Gesetz-  
gebung agefouert. Dëst Gesetz huet ënner  
anerem d'Instrument vum PAN-Gesetz 1999  
wéi den CAT an de Stage d'insertion duerch  
aner, méi effizient Instrumenter ersat, an  
zwar den CAE an den CIE.

Här President, léif Kolleeginnen, léif Kol-  
leegen, no dëser méi genereller Intro-  
duktioun géif ech gären op de Gesetzes-  
projet selwer ze schwätze kommen. Zënter  
dass de virleiende Gesetzesprojet am Joer  
2003 vum Aarbechtsminister an der  
Chamber déposéiert gouf, ass den Text  
substanziiell ëmgeännert ginn. Och wann  
d'Zil vum Gesetzesprojet nach ëmmer  
datselwecht ass wéi initial virgesinn,  
nämlech de Beschäftigungsinitiativen e  
legalen a finanzielle Kader ze ginn, esou  
ënnerscheet sech den initialen an de vir-  
leienden Text dach awer um Niveau vun de  
Mëttelen, fir dëst Zil ze erreechen.

Erlaabt mer kuerz, d'Haaptpunkte vum  
initiale Projet ze erläuteren.

D'Grondiddi vum initialen Text war et,  
d'Demandeurs d'emploi, déi méi wéi sechs  
Méint beim Arbeitsamt ageschriww sinn,  
esou schnell wéi méiglech op den  
Aarbechtsmaat ze integréieren. Den  
Akzent louch op der Qualitéit vun der Prise  
en charge vun de Chômeuren, an d'Finalitéit  
vun den Initiative war d'Insertioun, oder  
d'Réinsertioun, jee nodeem, vun de  
Chômeuren op den Aarbechtsmaat.

#### (M. Laurent Mosar prend la Présidence)

Den initialen Text, deen tëschent definitiven  
a provisoreschen Aktivitéiten ënnerscheet  
huet, hat d'Schafung vun engem neien  
Instrument virgesinn: de Contrat de mise à  
niveau. Dëse sollt den Iwwergank op den  
Aarbechtsmaat erméiglechen. D'Auteure  
vum initiale Gesetzesprojet wollten och  
privat Betriber, déi den Aarbechtsmaat a  
seng Besoinë solle besser kennen, mat an  
der Beschäftigungspolitik abannen. Si  
sollen och vun der finanzieller Ënnerstëtzung  
profitéiere kënnen. D'Gläichbehandlung  
vum privaten an associativë Secteur sollt  
och allen Diskussiounen iwwer eng eventuell  
deloyal Konkurrenz en Enn setzen.

Den initiale Gesetzestext huet des Weideren  
och nach d'Schafung vun engem Comité de  
suivi virgesinn. De Fonds pour l'emploi sollt  
och all Aktivitéit, déi als Zil d'Insertioun oder  
d'Réinsertioun huet, finanzéieren.

Dës éischt Versioun vum Gesetzestext ass  
staark kritiséiert ginn, an dat virun allem  
vum Statsrot, deen op e puer Punkte sech  
formell opposéiert huet. Hien huet ënner  
anerem d'Schafung vum Comité de suivi  
kritiséiert a gemengt, et misst ee sech op  
gängeg aarbechtsrechtlech Instrumenter  
bezéien. Déi initial Dispositioun vum Projet,  
déi virgesinn huet, dass just déi Betriber en  
Agrément géife kréien an domadder e  
Recht op déi finanziell staatlech Ënner-  
stëtzung hätten, déi eng Rei vu Konditioune  
géife respektéieren, ouni all Konditioun  
komplett opzelëschten, ass schäerfstens  
vum Statsrot kritiséiert ginn. De Statsrot huet  
domadder gedreet, keng Dispense vum  
zweete Vote kënnen ze ginn, wann déi

Dispositioun net ëmgeännert géif ginn.

Virgesi war och, dass Betriber, déi zënter méi  
wéi dräi Joer täteg sinn an déi, zur Zäit wou  
de virleienden Text a Kraaft trëtt, net d'Kon-  
ditiounen erfëllen, fir den Agrément ze  
kréien, en Délai vun zwee Joer hu fir sech  
un d'Konditiounen unzepassen. Während  
dem Délai sollten d'Betriber e proviso-  
reschen Agrément kréien. Nom initialen Text  
sollt den Aarbechtsminister op Basis vun  
engem Avis vum Comité de suivi d'Aus-  
nahme fir all eenzel Aktivitéit festleeën.

De Statsrot war der Meenung, dass hei-  
madder den Aarbechtsminister en arbiträre  
Pouvoir unerkannt géif kréien, an huet an  
dësem Kader nees eng Opposition formelle  
ausgesprach.

De Projet de loi ass zweemol vu sengen  
Auteuren amendéiert ginn. Den éischten  
Amendement hat als Objet, d'Dispositioun  
iwwert d'Marchés publics ëmzesetzen. No  
dësem Amendement sollt a sech d'Re-  
gierung iwwert de Wee vun enger Ausnahm  
d'Erlaabis kréien, Aarbechten oder  
Servicer mat Employeuren, déi am Beräich  
vun der Insertioun oder der Réinsertioun  
täteg sinn, duerchzefeieren.

De Gesetzesprojet ass eng zweete Kéier vu  
sengen Auteuren den 13. Juni 2006 amen-  
déiert ginn. Dës Amendementer sinn dorop  
zrëckzefeieren, dass d'Situatioun um  
Aarbechtsmaat zënter dem Dépôt vum  
Gesetzesprojet vill geännert huet. D'Aar-  
bechtslosegkeet huet enorm zougehall: vun  
2,6% am Joer 2002 op 5,2% am Joer 2006.

Dëse Phenomeen war net eleng op Lëtze-  
buerg begrenzt. D'Situatioun vum Aar-  
bechtsmaat an der Grenzregioun war net  
besser. Am Géigendeel! Do huet de  
Chômage och an de Joren tëschent 2002  
an 2006 enorm zougehall. D'Konkurrenz  
tëschent de Frontalieren an déi keng  
heemesche Salariéen huet sech zouge-  
spëtzt, mat der Konsequenz, dass déi Leit,  
déi zu Lëtzebuerg bei der Administration de  
l'emploi ageschriww waren an déi keng  
Qualifikatioun haten, et nach méi schwéier  
kritt hunn, fir eng nei Aarbechtsplaz ze  
fannen.

All dës Evenementer hunn als Konsequenz  
eng Hausse vun der Aarbechtslosegkeet  
mat sech bruecht. Betraff si virun allem  
erëm eng Kéier déi Schaffend ouni oder mat  
enger niddreger Qualifikatioun.

Vu dass d'Struktur vum Chômage sech awer  
zënter 2003 geännert huet, ass et net  
weider verwonnerlech, dass déi initial Iddi,  
den Demandeur d'emploi iwwert de Wee vu  
Beschäftigungsinitiative fit ze maache fir  
den Aarbechtsmaat, ëmmer méi schwéier  
ze realiséieren war. Derbäi kënnt, dass sech  
den Ëmgank mat Leit, déi eng reduzéiert  
Capacitéit hunn, an deene leschte Joren a  
sech geännert huet. Vun engem éischter  
passive System si mer lues a lues an e  
System gewiesselt, deen op d'Aktivatioun  
vun dëser Kategorie vu Salariée setzt.

Et geet och ganz kloer aus der Regierungs-  
erklärung vum August 2004 ervir, dass deen  
éischten Objektiv vun de Beschäftigungs-  
initiativen d'Prise en charge vun deene Leit  
soll sinn, déi wäit ewech vum Aarbechts-  
maat sinn.

D'Réorientatioun vum Gesetzesprojet kann  
een a sech op e puer Punkte résuméieren.

Déi provisoreschen Aktivitéiten, fir den Iwwer-  
gank op den ordinären Aarbechtsmaat ze  
erméiglechen, sinn am Kader vum amen-  
déierten Text ewechgefall. Den Text, deen  
aus den Amendementer vun 2006 ervirgeet,  
huet virgesinn, dass d'Insertiouns- an d'Ré-  
insertiounsaktivitéiten, déi staatlech sub-  
ventionéiert kéinte ginn, dem privaten an  
dem öffentleche Secteur géifen zou-  
kommen. D'Ausgrenzung vun den A.s.b.l.en  
ass domat gerechtfertegt ginn, dass  
d'Salariée misste motivéiert ginn, sech aktiv  
ze bedeelegen.

Obschonns déi amendéiert Versioun vum  
Gesetzesprojet nach ëmmer den Akzent op  
eng fréist méiglech Aktivatioun vun de  
Chômeure setzt, fuerdert hien d'Betriber op,  
op déi Instrumenter zrëckzegräifen, déi  
scho bestinn, amplaz sech nei Instrumenter  
ze schafen. An dëser Optik sinn d'Inser-  
tiouns- an d'Réinsertiounsaktivitéiten och  
als Iwwerganksmoossnamen ze verstoen.  
D'Beschäftigungsinitiative sollt sech virun  
allem op d'Schafe vu Strukture fir schwéier



vermëttelbar Chômeure konzentréieren, an net méi als Intermédiaire tëschent dem Arbeitsamt an de Betriber wierken.

D'Prise en charge vun den Demandeurs d'emploi sollt iwwert de Wee vun de sozio-ekonomeschen Aktivitéite geschéien, déi vun de Beschäftigungsinitiative proposéiert sollte ginn. Dës Aktivitéite sollten dem ordinären Aarbechtsrecht ënnerstoen a si sollten am Kader vun enger Gesellschaft, esou wéi se am Gesetz vun 1915 definéiert sinn, stattfannen.

D'Auteure vum Gesetzesprojet hunn d'Iddi vun engem Comité de suivi opginn an deementspreechend den initiale Gesetzesprojet amendéiert. D'ADEM, an net de Comité de suivi an de Comité permanent de l'emploi sollt elo de Suivi vum Gesetz maachen.

D'Auteure vum Gesetzesprojet hunn och hiren éischten Amendement zrëckgehol. Den amendéierten Text huet keng Dérégation zur Gesetzgebung iwwert d'Marchés publics enthalen. D'Auteuren hunn op dësem Punkt der Opposition formelle vum Statsrot Rechnung gedroen. In fine ass den Term vum „chômage social“ duerch den Term vum „chômage incompressible“ ersat ginn.

Den amendéierten Text gouf vum Statsrot den 20. Mäerz 2007 aviséiert. Hie war net d'accord, datt nëmme Gesellschaften am Sënn vum Gesetz vun 1915 vun de finanziellen Avantagen, déi de Projet de loi virgesäit, kéinte profitéieren. Esou eng Restriktion wier inkompatibel mam Égalitéitsprinzip, deen an der Verfassung verankert ass. Dëse Punkt huet fir eng nei Opposition formelle säitens vum Statsrot gesuergt, dee sech iwwregens och net mam neien Intitulé vum Gesetzesprojet zefridde gewisen huet. De Chômage incompressible ass vun Natur aus net reduzéierbar. Et ass e Widdersproch ze soen, datt ee géint esou eng Zort vu Chômage kämpft.

Här President, Dir Dammen an Dir Hären, wat elo déi grouss Linne vum virleiende Gesetzesprojet ugeet, esou ginn déi aus zwou Serië vun neien, dës Kéier parlamentareschen Amendementer ervir. Et ass virun allem déi éischt Serie vun Amendementer vum 12. Februar 2008, déi zu der definitiver Versioun vum heitegen Text gefouert huet.

Zu de wichtegsten Ëmännerunge kann een an éischter Linn d'Ofschafe vun der Differenzéierung tëschent den Activités d'insertion et de réinsertion an den Activités socio-économiques opzielen. Si bleiwe wuel als eenzel Moossname bestoen, mä all Employeur dierf op se alleguerten zrëckgräifen, an et ass net, datt eng Kategorie vu Moossnamen enger Kategorie vun Employéë virenthale gëtt.

D'Aarbechtskommissioun war nämlech der Meinung, datt mat der Differenzéierung, déi vun den Auteure vum Gesetzesprojet gewollt war, d'Beschäftigungsinitiative risquéieren, sech nëmmen nach mam Encadrement vun de Chômeuren, déi extrem schwéier vermëttelbar sinn, ze beschäftegen. D'Angscht vun der Kommissioun ass, datt mam System, wéi d'Auteuren e virgesinn hunn, d'Insertionsaktivitéiten nëmmen nach deenen Demandeurs d'emploi ugebuede ginn, déi keng gréisser Problemer hu fir sech um Aarbechtsmaart ze behapten. De Konzept vun den Auteure vum Gesetzesprojet féiert zu engem Denken a Kategorien, wat extrem schued ass, wann ee bedenkt, datt d'Beschäftigungsinitiativen als Zil hunn, jiddwerengem d'Integratioun op den Aarbechtsmaart ze erméiglechen.

(Interruptions)

D'Beschäftigungsinitiative sollen net nëmme sozioekonomesch Aktivitéiten ubidde kënnen. Si sinn iwwregens oft besser outilléiert, fir kënnen deene Leit ënnert d'Äerm ze gräifen, déi mat all Zort vu psychosoziale Problemer geplot sinn. De Gesetzestext, esou wéi e virläit, ënnersträicht um Niveau vu verschiddenen Dispositiounen de Prinzip no deem all Employeur censéiert ass, d'Prise en charge vun der gesamter Populatioun vu Chômeuren ze garantéieren.

D'Kommissioun huet och eng Ännerung virgehol um Niveau vun der Finalitéit vum Gesetzesprojet. Den Objet vum Gesetzes-

text ass net méi de Kampf géint de Chômage incompressible, mä de Kampf fir d'Integratioun oder d'Reintegratioun op den Aarbechtsmaart, an dëst egal wéi d'wirtschaftlech Lag ausgesäit.

Ier ech mat der Opzielung vun deene wichtigste Punkte vum virleienden Text wëll weiderfuere, wëll ech nach soen, och wann d'Kommissioun déi eng oder aner Dispositioun grondleeënd geännert huet, esou huet si awer dat meescht vum initiale Gesetzesprojet iwwerholl, entweder tel quel oder mat e puer Ännerungen. Laut dem neien Text soll all Employeur an de Genoss vun de finanziellen Avantagen, déi virgesi sinn, kënnen kommen, fir datt hir Aktivitéite kënnen subventionéiert ginn. Ob et sech also ëm Insertiouns- oder Réinsertionsaktivitéiten oder sozioekonomesch Aktivitéiten handelt, spillt u sech keng Roll.

Et mussen d'Employeuren e ministeriellen Agrément hunn a mam Aarbechtsminister e Kooperationsvertrag oder e Kooperationssofkommes ënnerschreiwen. Dëst Ofkommes oder dës Konventioun preziséiert ënner anerem d'Prestatiounen, déi den Employeur dem Chômeur muss ubidden. Et geet hei virun allem ëm d'Mesures d'encadrement, déi definéiert musse ginn. Déi finanziell Participatioun vum Fonds pour l'emploi gëtt och an dëser Konventioun festgeluecht, genee wéi och d'Modalitéiten, wéi d'Dossiere musse géréiert ginn.

Dëst ass besonnesch wichtig, wann ee wëllt eng adequat sozioprofessionell Evaluatioun vum Chômeur maachen. D'Kontrollmoossname wéi och d'Sanktionsméiglechkeete vum Stat ginn och am Kader vun der Konventioun fixéiert. De Gesetzesentwurf gesäit och nach vir, datt d'Indemnitéiten, déi am Kader vun engem CAE respektiv am Kader vun engem CIE ausbezuelt ginn, vum Fonds pour l'emploi zu 85% zrëckbezuelt ginn.

En individuellen Insertiouns- oder Réinsertionsparcours muss während den Aktivitéite festgeluecht ginn. Déi finanziell Ënnerstützung ënnerläit verschiddene Konditiounen, déi am Gesetzestext opgezielt sinn, wéi zum Beispill d'Noutwendegkeet en Agrément ze besetzen.

Den Agrément ënnerläit och verschiddene Konditiounen. Esou muss den Employeur, deen en Agrément ufreet, d'Uspréich vum Gesellschafts- oder Associatiounsrecht erfëllen. Si mussen och garantéieren, datt déi sämtlech Aktivitéiten, déi sech ubidden, fir all Demandeur d'emploi zougängeg sinn, onofhängeg vun ideologeschen, politeschen oder reliéise Considératiounen.

Wéi schonns ugedeit, muss nom Gesetzestext den Employeur och eng Konventioun mam Aarbechtsministère ofschléissen, déi déi genee Prestatiounen vum Employeur, oder den Oflaf vun der Prise en charge festhält, oder nach déi finanziell Subventioun festsetzt. D'Käschten, déi am Zesummenhang mat de verschiddene sozioekonomeschen Aktivitéite stinn, ginn am Kader vum virleienden Text definitiv, genee wéi déi finanziell Modalitéiten, definéiert.

Den Employeur muss zum Beispill eng precis analytesch Kontabilitéit maachen. Hie muss dem Aarbechtsminister och de Bilan virleeën. D'Gemengen an d'Syndikater si vun dëser Obligatioun net betraff.

En Décompte muss och all Joer dem Aarbechtsminister ënnerbreet ginn. D'Form an den Inhalt vun dësem Décompte ginn an der Kooperationskonventioun festgeluecht.

De Gesetzesprojet gesäit och hei Iwwergangsbestëmmunge vir. Wat den Agrément ministériel ugeet, esou hunn d'Employeuren, déi hir Aktivitéit méi wéi dräi Joer laang exercéieren, an déi den Dag, wou d'Gesetz a Kraaft trëtt, d'Konditiounen fir en Agrément net erfëllen, en zousätzlechen Délai vun dräi Joer, fir sech kënnen un d'Dispositiounen vum Gesetz ze halen.

Ier ech mat menger Interventioun ophalen, Här President, Dir Dammen an Dir Hären, wëll ech kuert nach op e puer oder op ee Punkt virun allem zrëckkommen. D'Regierung hat proposéiert den initialen Text duerch en Artikel ze ergänzen, dee virgesäit, datt spéitstens a sechs Joer, nodeem d'Gesetz a Kraaft getrueden ass, d'Employeuren hire Statut missten änneren an de Statut vun enger Association d'intérêts collectifs missten unhuelen. E Statut, deen u sech nei geschaaft soll ginn.

Mat dëser Propos wollt een op d'Kritik vum Statsrot reagéieren, deen a sengem Avis d'Iddi, datt och A.s.b.l.e kéinten Insertiouns- Réinsertionsaktivitéiten ubidden, a Fro gestallt huet. D'Kommissioun hat an enger éischter Phas dës Propos vun der Regierung ugehol. Weinst der Opposition formelle vum Statsrot huet se dunn awer gemengt, et wär besser dës Dispositioun nees erauszehuelen.

De Statsrot hat seng Opposition formelle domadder begrënn, datt een engem net d'Obligatioun operleeë kéint, säi Statut ëmzeänneren, wann dëse Statut u sech nach net géif existéieren. D'Regierung huet während enger Réunioun mat der Aarbechtskommissioun dorop higewisen, datt den Aarbechtsminister amgaange wär no Léisungen ze kucken.

D'Noutwendegkeet hei ze handelen, geet kloer aus engem rezenten Arrêt vum administrative Geriichtshaff an enger Affaire polygone ervir. No dësem Arrêt ass et den A.s.b.l.en net erlaabt un öffentlechen Ausschreibungen deelzehuelen.

Här President, léif Kolleeginnen a Kolleegen, et ass wichteg de Chômage an de Grëff ze kréien an ze kucken, datt jiddwereen de Wee op den Aarbechtsmaart fënn, sech integréiert oder nees réintégréiert. Mä maache mer eis näischt vir, et wäerten ëmmer Leit ginn, déi dëse Wee net packen, déi ni an engem Betrib ënnerdaach kommen. Mir mussen awer déi Leit beschäftegen. Si hunn och e Recht op sozial Integratioun iwwert de Wee vun enger Beschäftegung.

De virleiende Gesetzesprojet schaaft genee de Kader, dee mir hei brauchen. Mir hunn d'Méiglechkeeten, um Niveau vum net konkurrentielle Beräich Aarbechtsplazen ze schafen, fir schwéier oder guer net integréierbar Leit. Et spillt keng Roll, ob si elo op dësen Initiativen an dësen Aarbechtsplaze rentabel sinn oder net. Et kascht eis souwiso manner wann een dës Leit beschäftegt, wa si d'Chance kréien enger geregelter Tätigkeet nozegoen, wou se encadréiert ginn, wéi just doheem ze bleiwen a Chômagegeld oder RMG ze bezielen. Si sinn ausserdem doduerch vill méi nützlich, wat enorm wichtig fir dës Leit an hirt Selbstvertrauen ass.

Dowéinst, léif Kolleeginnen a Kolleegen, wär ech frou, wann Der dëse Projet mat grousser Majoritéit haut géift stëmmen. De virleiende Gesetzesprojet stäerkt déi sozial Strukturen, déi an eisem Land existéieren. Si stäerkt d'Leit, déi an dësem Domän schaffen. Mir kréien duerch dat heitegt Gesetz en Deel vun eisem Chômage besser an de Grëff, andeems mir jiddwerengem d'Chance gi beschäftegt ze ginn.

Här President, zum Schluss wëll ech u sech dem President an alle Membere vun der Aarbechtskommissioun Merci soe fir déi konstruktiv Beitrag a Mataarbecht bei dësem schwéiere Gesetzesprojet. Merci och dem Minister a senge Mataarbechterinnen a Mataarbechter, déi et net ëmmer einfach mat eis haten. E ganz besonnesche Merci geet awer un de Sekretär vun der Kommissioun, den Här Martin Bisenius, an un d'Madame Nadia Rangan, déi fir mech eng fantastesch Aarbecht gemaach hunn a vill Zäit an dëse Projet investéiert hunn.

An deem Sënn soen ech lech villmools Merci fir d'Nolauschteren.

» Plusieurs voix. - Très bien!

» **M. le Président.** - Ech soen dem Här Rapporteur Kaes Merci. Als éischte Rieder ass den Här Marcel Glesener agedroen. Här Glesener, Dir hutt d'Wuert.

Discussion générale

» **M. Marcel Glesener (CSV).** - Merci, Här President. Kolleeginnen a Kolleegen, de Rapporteur huet opgehale mat engem Merci un d'Adress vun enger Rei vu Leit, déi ee grousser Beitrag geleescht hunn um Zustanekomme vun dem Projet. Ech wäert dann och ufänken, andeem ech dem Ali Kaes e grousser Merci ausschwätze fir säi schréfflechen a mëndleche Rapport zum virleiende Projet.

Kolleeginnen a Kolleegen, een éischte Projet ass den 20. Mee 2003 déposéiert ginn. Dee Projet, dee mer haut diskutéieren, huet par rapport zum éischte Projet fundamental changéiert. Et ass dat e Musterbeispill vu gudder parlamentarescher Aarbecht; dat an enker Zesummenaarbecht mat der Regierung - net géint d'Regierung -, opgrond vun den Avice vun de Beruffschamberen, dem Statsrot an - et kann ee roueg soen - alle Fraktiounen, déi an der Kommissioun vertraude waren.

Net zulescht awer - an dat wäert ech besonnesch nach eng Kéier ervirhiewen - ass et de Verdéngscht vum Rapporteur, dem Ali Kaes, datt mer haut e Projet kënnen virleeën, deen op engem breede Konsens baséiert an deen den Erausforderung vun haut a virun allem och vu muer entsprécht. Nach eng Kéier Merci, Här Rapporteur.

Här President, Kolleeginnen a Kolleegen, wat sinn dann elo déi Erausforderungen, déi dëse Projet onverzichtbar maachen? Aus dem Bulletin vun der ADEM vum November 2008 geet ervir, datt 11.963 Leit

als Demandeur d'emploi ageschriwwen waren, dovunner 3.640 Chômeurs de longue durée. Dat heescht, datt 3.640 Leit am November dat lescht Joer méi wéi zwielef Méint ouni Aarbecht waren. D'Halschent vun de Chômeuren, déi ageschriwwen sinn, hu kee Schoulouf Schloss respektiv hunn no den obligatoreschen néng Joer mat der Schoul opgehal.

Knapps 11,4% vun den Demandeurs d'emploi hunn am November en héije Funktionsniveau ugin. Dës Donnéeën iwwert de Bildungs- a Formationsniveau vun den Demandeurs d'emploi entspreche mat Sécherheet net den Uspréich vun der Wirtschaft, déi awer méi technesch orientéiert, ergo méi komplizéiert a komplex gëtt, an dofir ëmmer méi op der Sich no héich qualifizéierten a polyvalenten Aarbechtskräften ass.

Leider ass et esou, datt vill Leit, déi an der ADEM ageschriwwen sinn, dës Uspréich net méi erfëllen. Do ass d'Politik natierlech gefuerdert, un éischter Plaz d'Éducation. Déi berufflech Formatioun fänkt an de Schoulen un. Et gëtt nach ëmmer vill ze vill Kanner, déi ouni iergendeen Of Schloss aus der Schoul kommen. Dat hu mir gëschter an eisen Débaté gesinn. Oder et si grad déi Kanner, déi ee muer an iwwermuer an de Statistike vun der ADEM als Chômeur de longue durée wäert ermëfannen.

D'Iddi vun der Regierung, fir zu Lëtzebuerg eng École de la deuxième chance ze schafen, ass sécherlech e gudden an e begréissenswäerte Moyen, mat deem ville Kanner a Jugendleche weidergehollef ka ginn. Mä et ass kee Wonnerméttel. D'Éducation muss méi flexibel ginn, sech méi un de Besoinë vun der Wirtschaft orientéieren. D'Schoul muss mat der Wirtschaft evoluéieren.

Nieft der beschtméiglecher Formatioun vun den zukünftigen Aarbechtskräften ass d'Politik awer och gefuerdert deenen ze hëllefen, déi d'Schoulbänk scho laang verlooss hunn an enorm Problemer hu sech um Aarbechtsmaart ze integréieren. An d'Zuel vun deene gëtt, wéi ech virdu betount hunn a wéi de Rapporteur hei ënnerstrach huet, ëmmer méi grouss.

De virleiende Gesetzesprojet schaaft e legalen a finanzielle Kader, deen d'Integratioun vun deene Chômeure fuerdert, déi wäit ewech si vum Aarbechtsmaart. An dësem Sënn reit sech de virleiende Projet an all déi Moossnamen an, déi an dësem Beräich während deene leschte Jore geholl gi sinn.

Wann et méiglech ass verschidde Chômeuren nees op de Wee vum Aarbechtsmaart zrëckzekeréien, zum Beispill iwwert de Wee vun enger berufflecher Réorientatioun oder iwwert de Wee vun engem Encadrement bei der aktiver Sich no enger Aarbecht um Aarbechtsamt, esou gesäit dat bei villen anere leider manner roseg aus, virun allem bei deenen, déi keng oder eng defizitär Qualifikatioun hunn.

Oder et ass, wéi dat de Rapporteur schonn a sengem Rapport festgehalen huet, dee Qualifikationsdefizit mat anere Problemer gekoppelt, déi derzou bäidroen, datt déi concernéiert Leit et ganz schwéier hunn eng Aarbechtsplaz ze fannen. Alkohol, Drogen, Depressiounen, virun allem awer och kierperlech a gesondheetlech Aschränkungen, Problemer am Stot, Konflikter an der Famill oder Iwwerscheldung: Dat sinn déi meeschten zitéiert Problemer, déi nieft enger ongenügender berufflecher Qualifikatioun erklären, firwat Leit esou laang am Chômage bleiwe respektiv net aus dem Chômage eraus fannen. Dës Leit riskéieren à terme um Rand vun eiser Gesellschaft ze liewen. Et geet och ëm déi sozial Kohesioun zu Lëtzebuerg.

Dat erkläert, Kolleeginnen a Kolleegen, datt et noutwendeg ass nei Weeër ze beschreiden. Et ass kloer, datt hei classesch Integratiouns- oder Réintegratiounsmethoden net méi duerginn. D'ailleurs géife se och net gräifen. Villes ass och schonn hei geschitt ënnert dem Impuls vun de Beschäftigungsinitiativen, déi natierlech ouni déi staatlech finanziell Ënnerstützung net à même gewiescht wären, fir am Beräich vun der Integratioun op dem Aarbechtsmaart aktiv ze ginn.

D'Beschäftigungsinitiative stelle fir d'Laangzäitarbechtsloser, déi net déi néideg berufflech a sozial Kompetenzen hunn, fir op dem „normalen“ - ënner Gänsefüßchen - Aarbechtsmaart eng Plaz ze fannen, eng adequat Äntwert duer. Iwwert de Wee vun de Beschäftigungsinitiativen an en adequaten Encadrement, kënnen si zréck an d'Berufswelt kommen. D'Beschäftigungsinitiative ginn de Leit, déi si betreien, déi néideg Motivatioun.

Duerch hir Betreierung eegnen déi concernéiert Chambere sech nees lues a lues



nei Kompetenzen un. Si kréien domat no an no hire Problem geléist oder zumindest gemeeschtert. Esou gëtt hir Employabilitéit wesentlech verbessert an hir Chancë gi méi grouss, erëm an den aktiven Aarbechtsmaart zrëckzefannen an hir Plaz an eiser Gesellschaft kënnen als vollwäerteg Mënschen anzehuelen.

Mam virleiende Gesetzesprojet sollen elo och Betriber - an dat ass begréissenswäert - an Zukunft divers Aktivitéiten ubidde kënnen, mam Zil d'Demandeurs d'emploi op den Aarbechtsmaart ze kréien. Si kennen effektiv wéi keen aneren den Aarbechtsmaart an d'Besoinë vun de Betriber, esou datt et Sënn mécht fir iwwerhaapt d'Betriber mat anzebannen an domat och all d'Kritike vun enger Concurrence déloyale aus der Welt ze schafen.

Ech fäerten awer, datt weinst dem Zäitopwand an dem Fachwëssen, dat erfuerdert ass fir eng Persoun erëm fit fir den Aarbechtsmaart ze maachen, net vill Betriber vun de Méiglechkeeten, déi dee virleiende Gesetzesprojet virgesäit, profitéiere wäerte respektiv si wäerte sech just ëm déi manner problematesch Chômeure këmmere.

Ech hoffen, datt meng Angscht a meng Besuergnis net berechtigt ass an datt vläicht am Ufank net esou vill, mä duerno ëmmer méi Betriber d'Chance ergräifen, zesumme mat anere Beschäftigungsinitiativen, fir engem Chômeur eng erfollegräich beruflech Integratioun ze erlaben, ob-schonns ech mer och bewosst sinn, datt zumindest fir de Moment d'Beschäftigungsinitiative outilléiert sinn, mat problematesche Chômeuren eens ze ginn. Mä och si hunn eng Kéier missen ufänken. Wat si fäerdeg bruecht hunn, kënnen och Privatbetriber fäerdeg bréngen. Et ass eng Saach vum Engagement an et ass eng Saach vum Wëllen.

Här President, Kolleeginnen a Kolleegen, de virleiende Gesetzesprojet spigelt d'Evolutioun an der Approche vum Chômage erëm, an d'Erkenntnis, datt een Deel vun der Aarbechtslosegkeet net vum wirtschaftlechen Opschwung profitéiert. E spigelt och dee Wiessel um Niveau vun der Aart a Weis, wéi ee mat Laangzäitaarbechtslose soll ëmgoen.

Wann de Wee zrëck bei ee Patron an de Betrib fir Verschiddener total illusoresch ass, esou erkenne mir awer endlech un, datt et och aner Weeër gëtt, fir d'Laangzäitaarbechtslosegkeet ze bekämpfen an deene Leit ze hëllefen, wéi d'Ausbezielung vum Chômagegeld oder dem RMG. Hei ass eng Moosnam, déi wesentlech derzou bäidréit a bäidroen kann, fir dee Problem besser an de Grëff ze kréien.

Kolleeginnen a Kolleegen, mam virleiende Gesetzesprojet kréien all déi Leit, déi sech dem Kampf géint de Chômage an der Ausgrenzung verschriwwen hunn, Moyenen, fir hiert Engagement besser a verstärkt widerzeféieren. Dowéinst steet meng Fraktioun mat Sécherheet hannert dësem Text.

Ech géif nach Folgendes derbäifüge bei dat, wat de Rapporteur gesot huet, am Zesammenhank mat de Formes juridiques vun deenen, déi sech sollen ëm déi Laangzäitaarbechtslos bekëmmere.

Et ass manner wichteg wia Beschäftigungsinitiativen initiéiert, mä méi wichteg ass et, datt déi déi et maachen, déi déi et kënnen, d'Moyenë kréien, fir et gutt ze maachen, an Intérêt vun deene Mënschen, déi ouni Aarbecht sinn an déi Problemer hu fir eng Aarbecht ze fannen, an domat sech an eis Gesellschaft ze integréieren. Dorop kënn et un, an et ass och dat d'Ursaach, firwat ech den Accord vun eiser Fraktioun zu dem virleiende Projet ginn.

Ech soen Iech Merci.

» **Plusieurs voix.** - Très bien!

» **M. le Président.** - Ech soen dem Här Marcel Glesener Merci. Als nächste Riedner ass den Här Alexandre Krieps agedroen. Här Krieps, Dir hutt d'Wuert.

» **M. Alexandre Krieps (DP).** - Merci, Här President. Ech hu gëschter Owend nach den Exposé des motifs vun deem Gesetz, wat 2003 déposéiert ginn ass, nogekuckt, an dat ass e Gesetz, wat effektiv justifiéiert ass fir eng Base légale an deenen aarbechtsbeschaffende Gesellschaften, an deenen Initiatives sociales do erbäizebréngen. Als fënnette Punkt stoung do och eppes vun der Transparence financière, mä ech hunn am Gesetz leider keng Fiche financière fonnt, esou dass de Minister ons herno soe kann, wat dat da kascht, well dat trotzdeem eng interessant Considératioun ass.

Et ass virdrun hei zu Recht gesot ginn, dass de Conseil d'État d'Société commerciale gefuerdert huet an och dee Comité du suivi

ausgeblendt huet, well dat ze vill ëmständlech wier. Kritesch Froe sinn natierlech scho beim Numm ugaangen, chômage social, chômage incompressible. Ech sinn och der Meenung gewiescht - de Plein emploi ass zwar an dëser Period ganz ambitieus -, dass dat hei e méi adequat Wuert ass, fir de Leit d'Hoffnung ze loosse. De Minister hat och deemools an der Kommissioun selwer gesot, dass et net wier fir do Leit opzefänken déi net schaffe wëllen, mä déi déi einfach net kéinte schaffe goen.

Wat sécher ass, d'Décisioun bleift jo bei der ADEM, wéi eng Leit an déi dote Forme vun der Aarbecht ginn. Et war och vu virera gesot ginn, dass Contrats de travail spéciaux net erwünscht wieren an dass ee soll den Droit du travail commun loosse. Et war och gesot ginn, dass de Stat keng Carrière kéint garantéieren, mä misst de Mindestloun garantéieren. Bei de Marchés publics, dat ass virdru gesot ginn, do hu mer elo natierlech déi Justizdécisioun, wat Polygone ubelaangt, do brauch een net drop zrëckzekommen.

De Finanzement natierlech, dee virdru 75% op de Fonds de l'emploi komm ass, ass elo 100% drop. Och 37% vun den Infrastrukturen, an dat ass och schonn e Fortschrétt géif ech mengen. Ech hoffen natierlech, dass de Minister d'Agrémentskonditiounen am A behält, well soss kréie mer awer eng Multiplikatioun vun deenen dote Firmen. Mir hunn där jo schonn eng Rei um Maart. Da wier et och nach interessant ze wëssen, wat déi Kritäre wieren.

D'Transitionspann ass ugeschwat ginn, bis et solle Sociétés commerciales ginn, an d'Forme juridique also och. De Statsrot huet och kritiséiert, dass an deem éischte Gesetz véier Psychologe sollten agestellt ginn. Mer hu jo scho Psychologen am PAN-Gesetz agestellt, an ech hoffen net, dass herno an der ADEM méi Psychologe sëtze wéi Leit déi eng Aarbecht sichen. Zemoools wou se elo an der lescht, dat si mer d'lescht Woch gewuer ginn, d'Évaluation psychologique an d'Kompetenzbilanen auslagere op Interactions, an esou virun. Also et freet ee sech, ob mer iwwerhaapt dann nach Psychologe brauchen, wa mer et dach auslagere.

Eng Kritik war och, beim Statsrot am éischte Volet, dass de Ratio tëschent den Encadrants an den Encadrés einfach ze héich wier. Et wier en ze héijen administrative Waasserkapp. Dann ass do nach déi Affär vum Finanzement vun 100%. Mer wësse jo, dass an enger éischer Etapp souguer d'Organisatiounen dergéint waren, well se net nécessairement wollten en parallèle gesat gi mam Handicap. Dat ass am Ufank gesot ginn. En anere Problem, wou ech de Minister och gären héiere géif, ass, wéi et mat der TVA steet, esou laang déi Iwwertragnungsperiod ass, well do jo d'Administratioun vum Enregistrement d'TVA aklot.

Interessant war och déi Formel, déi bei verschiddene Projekte koun, wou de Cofinanzement vum Fonds social européen zum Deel matgesponsert ginn ass, an duerch onse Stat. Transparenz, dat läit ons jo gewéinlech um Mo, net nécessairement den Dialog, mä ech mengen et sinn zéng Joer hier, dass mer dat als Slogan haten. D'Commission de l'exécution budgétaire...

(Interruptions)

Jo, dat och, mä ech mengen, dat ass zwar nach ëmmer gutt. Do soll ee sech drun halen. Dat kënnt erëm bei aneren, genau wéi „de Mënsch am Mëttelpunkt“, dat hate mir schonn an de 70er Joren als Slogan. D'nächste Kéier bréngen ech ons Programmer mat. „Jiddwereen zielt“, dat hu mer och scho kannt. „Jiddwereen zielt“ an „de séchere Wee“. Mir ginn alt nei Weeër. Wéi sécher en ass, dat gesi mer, mä ech mengen...

(Hilarité)

Dir musst Iech e bëssen entspanen hei!

Op alle Fall ass et jo och virugaange mat engem Audit financier iwwert d'Period 2000-2003. Wann et een interesséiert, ech hunn en hei a mengen Dokumenter. Ech hunn och ni eng Zuel fonnt vum Retour op de Marché primaire. Ech hunn déi Zuelen einfach net fonnt, mä ech wier drun interesséiert eppes doriwwer ze héieren, dat ze wëssen.

Et ass jo kloer, dass wann ee vu Chômage incompressible géif schwätzen, dat géif jo d'Faillite vun der Regierungspolitik am Emploi, loosse mer soen, an Evidenz setzen. D'Selektioun vun de Kandidaten hu mer gesinn. Ech si ganz frou, dass mer déi Employabilitéitskategorien net an d'Gesetz geschriwwen hunn, well da géif een de Leit quasi Etiketten op de Réck pechen; an dat deet wéi, wann ee se kategoriséiert, definitiv. De Marcel Glesener an den Ali Kaes hu vun Netqualifikatioun an esou viru geschwat. Ech erënneren awer un e Saz,

deen onse Kolleeg Jos Scheuer e Samschdeg um Radio gesot huet: „Et kann een net an alle Problemer der Schoul d'Schold ginn.“ Dat ass hei och e Problem. Déi Incapacité sociale, déi mer hei och am Text gelies hunn, dat ass eng zimlech désespérant Situatioun.

D'Haaptroll am Suivi duerch d'ADEM ass jo dee Service d'accompagnement personnalisé, déi jo dann décidéieren. Ech mengen, am September 2006 stoung e ganz interessante Saz an der Commission du Travail et de l'Emploi: «Il importe aussi que la réforme de l'ADEM aille de pair avec l'évacuation du projet, afin que les services administratifs compétents soient mis en état de répondre efficacement aux nouvelles exigences.» Dat, wësse mer alleguer, ass net geschitt.

Den Här Ombudsmann Marc Fischbach huet de 25 November 2008 an der Chamberskommissioun - an do hunn der vill vun ons onsen Oueren net gegleef, wéi mer dat héieren hunn, a souguer ons Membere vun der Kommissioun hu gesot, dass déi ADEM guer net méi am Zoustand wier, fir den Développement vum Chômage an de Grëff ze kréien - haaptsächlech gesot, dass d'Infrastruktur defizitär wier, mä och dass d'ADEM géif schlecht fonctionnéieren an d'Organisatioun esou defizient wier, dass intern eng Koordinatioun ass, déi total dysfonctionnéiert.

De Bureau d'accueil. Ech muss soen, wann ee moies iwwert d'rue Bender trëppelt, deen Accueil vun deene Leit, déi do am Ree stinn, zu 30, 40, 50 hirer, ech gleewen, dass d'Béischten an engem Schluechthaus besser empfaange gi wéi déi, an ech kann Iech soen...

(Interruptions)

Dach, dach, dat ass ganz dramatesch. Ech stelle mäin Auto heiansdo an de Parking vun der Rocade, da ginn ech do laanscht. Ech kann Iech soen, dat ass traureg. An do gëtt et also Zäit, dass d'Regierung do eng Prioritéit setzt.

Vun deene Placeuren, déi iwwert déi lescht dräi Joren agestellt gi sinn, sinn der 13, déi keng Fonctioun als Placeur hunn, an d'Zuel ass awer vun 18 bis op 43 eropgeklommen, dovunner 30 mat eben enger Fonctioun als Placeur. Dat huet guer näischt geännert. Dat ass och net ze änneren. D'Bilane sinn net gemaach ginn, ech hunn dat scho gesot. D'Moral vun der Geschicht: D'ADEM huet sech einfach net der Evolutioun vum Aarbechtsmaart ugepasst. Si fuere mat Rezeptur vu gëschter, a guer net mat Léisunge fir haut oder haaptsächlech muer.

Wat ech och nach ze soen hunn, dat ass, d'Struktur vun där Verwaltung ass an där Form, wéi se besteet, net ugepasst. Mir wëssen natierlech, dass d'Regierungen an deene leschte Jore mat der Fonction publique verhandelt hunn an och de Rôle vun den Établissements publics ausklamert hu fir de Moment, mä ech mengen, et ass fir eng zukünfteg Regierung ubruecht, fir mat der CGFP dat ze verhandelen.

De Chômage klëmmt, en ass och an Zäite geklomme wou onse PIB 5%, 6% an d'Luucht gaangen ass, en ass och geklomme wou mer 12.000 bis 15.000 Aarbechtsplaze geschaaft hunn. Ech hu mech ëmmer gefrot, wou déi wieren. An d'ADEM, déi lagert déi schwierig Fäll aus, wéi gesot, un d'Beschäftigungsinitiativen, d'Psychologen an esou virun. Et wier also elo un der Zäit fir eng Evaluatioun ze maachen. Déi ass zwar regelméisseg gemaach ginn, mä et ass ni vill erauskomm dobäi: Vum PAN-Gesetz, wat elo am Februar 10 Joer feiert, vun 5611, dee jo hei an dësem Haus virun dräi Joer gefeiert ginn ass wéi eng Panacée. De Fonds de l'emploi misst een och nach eng Kéier kucken, wéi do d'Dépensë geklomme sinn, dat géif een interesséieren.

D'ADEM géréiert also d'Aarbechtslosegkeet, an et brauch een nëmmen an dëser Legislatur ze kucken, dass säit 2004 d'Zuelen ëm 25% geklomme sinn, haaptsächlech aux dépens vun de Leit iwwer 50 Joer. Ech muss zwar och do derbäi soen, dass déi dräi Invaliditéitsgesetzter, déi an de leschten zéng Joer gestëmmt gi sinn, zimlech haart si vis-à-vis vu Leit, déi fréier iwwer e medezinesche Modell pensionéiert gi wieren. Mä mer mussen ons awer virun Aen halen, dass een net mat medezinesche Modeller sozial Problemer léist.

D'Budgete vun der ADEM a vum Ministère, dat hunn ech gesot, missten also gekuckt ginn. Wann ee mat de Patrone schwätzt, dann héiert een déi eng soen: „Ech ëmginn d'ADEM esou oft ech kann. Also wann ech se ka contouréieren, maachen ech et.“ Anerer si ganz zefridde mat deene Consultants, déi haaptsächlech fir verschidden

ekonomesch Secteuren do sinn, déi gewéinlech selwer aus der Privatindustrie kommen an déi d'Problemer an der Industrie oder an dem Geschäfts- oder an anere Secteure kennen. Där hu mer der, mengen Informatiounen no, aacht oder zéng. Mä déi Patrone si mat deenen extrem zefridden. Se soe par contre, soubal Dir et mat der Administratioun als solches ze di kritt, da fänkt et u lues a komplizéiert ze ginn.

E gutt Beispill sinn déi Indemnités de ré-emploi, wou de Patron muss all Mount déi Pabeieren ausfüllen, an dat dauert jo bekanntlech bis véier Joer. Dat ass eng administrativ Hürd, déi gehéiert reduzéiert ze ginn. An da wier et awer un der Zäit, mer hate jo x Auditen, mer haten x Pabeiere vun der OECD, mer hate Pabeiere vun onsem Statec leschte Summer, et gëtt elo Zäit fir eng aussestehend, neutral Firma ze huelen an e bëssen ze kucke wéi et geet, well de Gruef zwëschent dem Aarbechtsmaart an der ADEM gëtt ëmmer méi breet a méi déif.

D'Convention d'activation individuelle muss obligatoresch ginn, se muss och vill méi fréi ugesat ginn, wéi dat elo de Fall ass. An da widderhuelen ech, dass mer en Dënschdeg virun aacht Deeg mat der Chamberskommissioun op d'ADEM gaange sinn, an do konnt ee sech effektiv iwwerzeegen, dass d'ADEM net méi vill mam Aarbechtsmaart ze dinn huet, mä méi mat enger sozialer Institutioun. Mir krute souguer Zuelen dohinner geluecht, déi schonn zwee, dräi Méint al waren.

Den Ombudsman, den Här Fischbach, eng respektéiert Persoun, hat jo der Regierung un d'Häerz geluecht, fir d'Direktioun vun der ADEM auszewieselen. Den honorabelen Här Castegnaro huet dat nämlech haut um Radio gefuerdert. Ech hunn hien net héieren, an ech si bekanntlech net ëmmer d'accord mat him, mä an där Fuerderung schléissen ech mech dem Här Castegnaro un. Dat huet och eppes mat deem Audit ze dinn, mat dem Aarbechtsmaart, mir schwätzen hei och dovunner. Dat ass en Deel dovunner.

(Interruptions)

An d'ADEM muss déi Leit kontrolléieren, déi...

» **M. le Président.** - Den Här Krieps huet ganz eleng d'Wuert.

» **M. Alexandre Krieps (DP).** - Neen, dat ass ze vill verlaangt, Här Mosar.

(Hilarité)

Also, ech wëll just soen, dass d'ADEM déi Leit kontrolléiert, déi an déi sozial Beschäftigungsmesurë kommen. Do kënnt Dir also net soen, d'ADEM hätt näischt domadder ze dinn. Dës Legislatur hu mer souwisou schonn e puer Verwaltungschefen ofgesat, bei der Police, bei Sites et monuments, et geet net op een un. Ech mengen an ech géif och behaapten, dass d'ADEM e Schëff ouni Kapitän ass, dat trotz dem méi staarke Wellegank gedriwwen gëtt, an ech hoffen och, dass de Minister Biltgen geschwë seng Schwammwest uleet an de Rettungsrank prett hält, well dat hei geet net ganz gutt momentan.

» **M. Marcel Glesener (CSV).** - Mir hëllefen dem Minister.

» **M. Alexandre Krieps (DP).** - Ech erwaarden dat och. Ech hëllefen him och gären, mä hie muss e bësse méi oft op ons lauschtere wéi op Iech, Här Glesener.

D'DP seet och dem Rapporteur Ali Kaes villmools Merci fir säin ausféierleche mëndlechen a schrëftleche Bericht a wäert dat hei Gesetz och stëmmen, trotz deene puer Mängel, déi dra sinn, well dat hei Gesetz sech ëm déi Äermsten an onser Gesellschaft bekëmmert an hinnen d'Hoffnung léisst.

Ech soen Iech Merci.

» **Plusieurs voix.** - Très bien!

» **M. le Président.** - Ech soen dem Här Krieps Merci. Als nächste Riedner ass den Här Schneider agedroen. Här Schneider, Dir hutt d'Wuert.

» **M. Romain Schneider (LSAP).** - No deenen émouvante Wieder vum Alexandre



Krieps a sengem typesche Stil, probéieren ech erëm e bësse Rou an dës Diskussioun eranzekréien.

Här President, Dir Dammen an Dir Hären, fir d'éischt géif ech emol dem Rapporteur vun dëser Plaz aus Merci soe fir säi mëndlechen, awer och virun allem säi schrëftleche Rapport, deen eis, mengen ech, am Detail déi ganz Situatioun vum Marché de l'emploi gewisen huet, och d'Facettë vum Chômage, an och eigentlech den Inhalt gewisen huet, firwat datt mer dëst Gesetz ëmänneren, firwat mer op dëse Wee gaange sinn dëst Gesetz iwwerhaupt ze maachen.

Dëst Gesetz war e laange Prozess. Vun 2003 un hu mer iwwert dëst Gesetz geschwat, hunn diskutéiert, hunn an der Chamberskommissioun Iddien erabruecht, Amendementer erabruecht, krute vum Conseil d'État Avice geschéckt, kruten Iddien iwwert de Koup gehäit a si schlussendlech zu dësem Gesetzesprojet komm, dee mer de Mëtteg hei diskutéieren an och ofstëmme wäerten, an deen am Endeffekt eigentlech nëmmen zwou Saache beinhalt.

Déi Éischt, datt mer elo kloer Regeln, datt mer e Kader setze fir de Finanzement vun deenen eenzelnen Initiativen, vun deenen eenzelne Mesuren, fir eben de Rétablissement vum Plein emploi ze garantéieren. Méi ass et am Prinzip net, wat mer de Mëtteg hei maachen: Dee legale Kader setzen, an derniewent, mengen ech, awer och ganz kloer definéieren, wat fir eng Form vu Kontrakter an Zukunft kënn vum deenen eenzelnen Initiativen ofgeschloss ginn, an derniewent och wéi dann elo den Encadrement ausgesäit, wéi d'Formatioun geregelt ass a wéi déi eenzel Konventionen ofgeschloss ginn. Alles dat, mengen ech, ass en technesche Volet, deen den Ali Kaes de Mëtteg hei am Detail erkläert huet, schrëftlech an och mëndlech.

Duerfir wëll ech net op Eenzelheeten agoen, fir nach eng kéier iwwert de Projet an den techneschen Detailer ze schwätzen, mä ech wäert e bëssem aushuelen an eigentlech kucken, wéi schonn an der Vergaangenheet dës Initiativen, dëst Zesummeschaffen zwëschent deenen eenzelnen A.s.b.l.en an den Demandeurs d'emploi, an awer och deenen anere Partner, souwuel de Partner vun der Economie wéi vun de Verwaltungen, der ADEM, an anere Partner, déi och matgespillt hunn, eigentlech fonctionnéiert hunn. Et kann een an der Regel soen, datt et en exzellent Fonctionnéiere war, wou villen dausende vu Leit konnt gehollef ginn, direkt oder indirekt.

Et ass de Mëtteg och keng Debatt hei gefouert ginn iwwert d'ADEM, déi féiere mer op enger anerer Plaz, déi wäerte mer féieren, wann de Projet de loi iwwert d'Reform vun der ADEM wäert kommen. Duerfir solle mer eis de Mëtteg konzentréieren, fir den zwee Voletë vun der Bekämpfung vum Chômage entgéintzegoen. Den Éischten ass deen, dee mer alleguerten heibannen an der Chamber, an ech mengen och dobaussen, ustriewen, dat ass den Erhalt vun den Aarbechtsplaze vun deenen eenzelne Leit.

Dat sinn déi eenzel Mesuren déi mer ustriewen, wou mer de Mëtteg elo nach déi vum Chômage partiell, déi liicht Émännerunge vun dësem Joer, déi nei Bestëmmunge wäerten ofstëmmen, an derniewent all déi Saachen déi bestinn, wéi d'Aide au réemploi, wéi steierlech Moossname fir Betriber, wéi derniewent ze kucken, wéi mer duerch Formatioun, duerch d'Instrument vum Maintien dans l'emploi probéieren d'Aarbechterinnen an d'Aarbechter, d'Employéén, d'Salariat souzesoen am Aarbechtsverhältnis ze behalen.

Do dernieft fanne mer awer eng Rei vu Leit erëm, wat evident ass, a virun allem mengen ech, beim Usteige vum Chômage, deen Enn des Mounts, Enn November bei 4,7% louch, Enn Dezember nach e bësse méi héich, a wou mer wëssen, datt en an Zukunft wahrscheinlech nach wäert klammen, wa mer elo scho gesinn, wat fir eng Betriber Kuerzaarbecht ugekënnegt hunn, a wa mer och gesinn, wéi d'wirtschaftlech Lag dobaussen ass.

Da gëtt et deen zweete Volet. Dat ass eben deen, dee mer hei ustriewen, dee mer hei kucken ze regelen, dee mer probéieren an

engem legale Kader elo ze regelen, fir de Leit direkt ze hëllefen. Dat ass dee fir déi Leit opzefänken, déi keng Aarbechtsplaz méi hunn, déi effektiv an de schwéieren Zyklus vum Chômage erafalen, an entweder nach eng Indemnitéit kréien oder keng Indemnitéit méi kréien, sief et Chômage, sief et RMG, oder iwwerhaupt näischt méi hunn. Grad duerfir, mengen ech, sinn dës Initiativen entstanden.

Mech huet eigentlech och beweegt, obwuel ech d'Zuele kannt hunn, wéi d'Struktur vun eisen Demandeurs d'emploi wier. Wéi mer bei der ADEM waren, krute mer d'Zuelen dohinnergeluecht, wat - a Klammeren - Dageszuele waren, déi een net esou genau muss huelen, mä de Prozentsaz huet awer geklappt.

A wa mer dervun ausginn, datt mer eng Ennerdeelung vun de Chômeuren a Kategorieën maache vun A bis E, wou A a B eigentlech déi sinn, déi relativ einfach ze placéiere sinn, wou d'„A“en am Prinzip ganz kuerz am Chômage sinn a wou se ganz séier eng Aarbechtsplaz selwer oder indirekt duerch d'ADEM fannen, an zweetens, déi vum B eng llicht Hëllef brauchen, fir déi Orientéierung ze kréien, esou stellen all déi Kategorien duerno vun C, D an E 68% vun den Demandeurs d'emploi duer.

Grad dat sinn déi Leit, déi mussen opgefaange ginn. Déi gi selbstverständlech duerch eng Rei vu Mesuren, duerch eng Rei vu Servicer vun der Verwaltung a vun anere Verwaltungen opgefaangen, mä dat sinn awer och déi Leit déi hei mussen en Nest fannen, fir kënnen direkt ënnerstëtzt ze ginn. Bei deene muss probéiert gi se op de Wee ze kréien.

Virun allem déi, déi aus dem Secteur vun deenen ënneschte Schichte vum E kommen, brauchen eng massiv Hëllef. Do muss ech lech éierlech soen, an dat och aus praktescher Erfahrung eraus, gesinn ech awer keng aner Strukture wéi déi vun den Initiativen, fir déi dote Leit korrekt a gutt opzefänken. Hei gëtt effektiv an de leschte Jorzéngten um Terrain eng ganz wäertvoll Aarbecht geleescht. Hei sollte mer op dëser Plaz all deenen, déi bis elo am Bénévolat an den A.s.b.l.e gehollef hunn, e grouse Merci soe fir déi onentgeltlech Aarbecht, déi se Dag fir Dag hei leeschten.

D'Situatioun awer um Aarbechtsmaart wäert derniewent changéieren. Et wäert also nach méi schwéier ginn, datt och dës Initiativen de But, dee se alleguerte verfolgegen, fir déi Leit erëm an dee ganzen Aarbechtsprozess zrëckzekréien, erreechen.

Mir wäerten an Zukunft de Phenomeen kréien, dass Enn des Mounts ganz vill Offres d'emploi opstoebleiwen. Dat gesi mer elo, well mir haten der an der Zäit esou an der Moyenne ëm déi 2.000, déi Enn des Mounts opbliwwen sinn. Um Enn vum Mount November ware mer scho bei 1.600; also tendenzfalend. Den nächste Mount wäerte mer gesinn, datt d'Offer-Plazen zrëckginn, an op där anerer Säit d'Demandes d'emploi wäerte steigen.

D'Schéier also zu deem, wat machbar ass, wäert an Zukunft méi grouss sinn. Et wäert also nach méi schwéier ginn eng Aarbechtsplaz ze fannen; eng fest Aarbechtsplaz ëmsou méi schwéier.

Dofir geet dëse Projet de loi an déi richteg Richtung. E setzt déi richteg Akzenter an e féiert op dat zrëck, wat ech virdrun ugeschwat hunn: déi laang Traditioun vun dësen Initiativen, vun dëse Beschäftigungsinitiativen; wat kee positiivt Wuert ass, mä ech fannen einfach keen aner fir et ze benennen; wat awer dat erëmispigelt, wat et effektiv ass.

Well effektiv, wéi et schonn ugeklongen ass, souwuel vum Ali Kaes wéi och vum Marcel Glesener: Et gëtt hei keng Beschäftigungstherapie gemaach. Et gëtt geschafft um Wäert vun de Leit. Et gëtt Formatioun gemaach. Et gi Servicer ugereegt. Et ginn nei Besoinë kreéiert.

Dës laang Traditioun vun Initiativen ass entstanden aus A.s.b.l.en a virun allem aus Gewerkschaften, déi sech verpflichtet hunn eng Hand mat unzepaken, fir eben deem dote Fléau entgéintzewierken, déi grad deene Schwaachen an der Gesellschaft eng Hand upaken, fir erëm zrëck an den Aarbechtsprozess ze kommen an hinnen hëllefen eng sënnvoll Aarbecht, eng moralesch nei Wäertung unzestriewen.

Hei hunn awer och nientweng d'Gewerkschaften d'Gemengen eng ganz wichteg Roll gespillt, souwuel materiell wéi och finanziell. Och hei goufen der eng Rei opgezielt.

Wat déi eenzel Initiative betrëfft, esou si ganz guttbekannt: den OPE mat hire CIGLen a CIGRen, derniewent de Forum, de ProActif an dann d'Perspective Emploi,

wéi awer och derniewent déi eenzel Gemengen, déi opgezielt sinn - Diddeleng an Ettelbréck -, déi eenzel Projekte lafen hunn, déi formidabel fonctionnéieren, déi eigentlech e Virbild si fir all déi aner Gemengen. Dofir och en Appel un d'Députés-mairen, déi nach net esou Initiative matënnerstëtzen, fir dës direkt an de Gemengen anzeféieren, fir esou Initiativen ze maachen.

Haut ass schonn déi Aarbecht, déi geleescht gouf, vun där ech geschwat hunn, eng formidabel Aarbecht. An och wa mer de Mëtteg net vun der ADEM schwätzen, esou muss een awer soen, datt grad dës Initiativen d'ADEM entlaaschten, datt se hinnen hëllefen nientweng deene Strukturen, nientweng deem Personal, dat besteet, honnerte vu Leit, déi encadréiert musse ginn, do ze betreiwen. Dat sinn Educateurs; dat sinn Educatrices; dat ass d'Personal, dat aus de Betriber kënnt, dat Erfahrungen huet, fir déi Leit kënnen unzepaken, an dat awer och de soziale Feeling muss hunn, fir déi doten Demandeurs d'emploi kënnen richteg unzepaken.

Wat am Endeffekt derbäi erauskënnt, ass fir mech eng „win-win“-Situatioun. Et ass e „win“ fir den Demandeur d'emploi, de Mensch u sech, deen eng Bestätegung kritt all Dag erëm kënnen enger wäertvoller Beschäftegung nozegoen, de Rhythmus vum schaffen, de Rhythmus vun där normaler Wirtschaft kënn virunzedriewen, moies opzestoen, eng wäertvoll Aarbecht ze leeschten, eng bleiwend, eng nohalteng Unerkennung ze kréien.

Op där anerer Säit gi mer dem Bierger nei Servicer, gi mer him Servicer, déi mer an der Regel net géife realiséieren, wa mer dës Initiativen net hätten.

Drëttens kréie mer Projekte realiséiert - dat gesi mer alleguerten all Dag an de Gemengen, um Land, beim Stat an iwwerall -, déi mer am Prinzip net géife maachen. Dat sinn och Projeten, déi gutt sinn, déi bleiwend sinn an déi souwuel de Kanner wéi alle Leit, den Elteren, awer och der eelerer Bevölkerung zegutt kommen. Ech wäert herno nach eng kéier op déi Besoinen an déi Servicer zrëckkommen.

Derniewent soll een eppes net vergiessen, wat bis elo ni hei ugeschwat gouf. Och dës Initiativen, och wa se ee Charakter hu vu Formatioun, vun neie Wäerter schafen, vu Beschäftegung kreéieren, sinn och déi vum Placement. Ech kennen dausende vu Fäll, déi duerch esou eng Initiative konnten eng nei Aarbechtsplaz vermëttelt kréien, entweder direkt oder indirekt.

Derniewent och dat Ureege vum Sënn vun Aarbechten, vum Sënn vu Beruffer. Wou mer ganz séier erëmfannen, datt eng ganz Rei vu Léierverträge ofgeschloss konnte ginn, souwuel fir Adultë wéi och fir Jonker, déi en neie Spaass um Léiere kruten, a wou souzesoen eng ganz nei Schoul vun der zweeter Chance hei entstanden ass fir zrëck an d'Liewen erëmfannen, wou sech ganz séier d'Kompetenzen erausgeschielt hunn, déi se hunn.

Wa mer ganz dacks iwwert de Wäert vun dëse Kompetenze schwätzen, hei fanne mer se konkret erëm. Ech kennen op jidde Fall an der Praxis eng ganz Rei vu Beispiller, wou dëse Placement nientweng dem Op-huelen, nientweng der Betreiung vun de Leit och fonctionnéiert huet.

Dëst Gesetz ass awer och kloer - an dat hu mer och an der Kommissioun als LSAP gesot - fir eis nëmmen eng Tëschenetapp als Schratt hin zur Économie solidaire.

D'Forme juridique, déi och hei ugeschwat gouf an déi jo an dësem Feld nëmme gespillt huet, fir d'Matmaachen an de Soumissiounen, wou jo och d'Uerteel dat ass, datt d'A.s.b.l.en net kënnen un enger Soumissioun deelhuele an dofir eng nei Forme juridique muss gesicht ginn, deet et mir och leed, datt no laangen Diskussiounen, no laangen Avisen, déi geschriwwen goufen, leider dës nei Forme juridique net an dësem Projet de loi elo festgehale konnt ginn a mer viru musse kucken nei Weeër ze fannen, datt mer och hei kënnen un öffentliche Ausschreiwungen deelhuele, wou dat sozialt Element muss mat erakommen; och wa mer wëssen, datt an der Praxis schonn eng ganz Rei vu Betriber dëse Wäert matdroen an déi sozialt Element fräiwëlleg an hir Ausschreiwungen, an hir Cahiers de charges mat integréieren. Dëst ass och e Wäert a wäert an Zukunft och en nohaltege Wäert sinn.

Mir hunn hei - an dat kann een indirekt soen; datt ass mat Sécherheet déi Kritik, déi vu baussen dacks kënnt - een éischten an een zweeten Aarbechtsmaart. Jo, d'Économie solidaire ka fir mech fonctionnéieren nientweng der Wirtschaft. Firwat net? Dofir muss mer et net negativ als zweeten Aarbechtsmaart duerstellen.

Et si ganz einfach Servicer, déi musse gemaach ginn. Et si Servicer, déi entstane sinn dobaussen. Et sinn nei Weeër, déi mer fonnt hunn. Duerfir solle mer och ganz kloer de Wee vun dësem zweeten Aarbechtsmaart, der sougenannter Économie solidaire, parallèll derzou goen an an Zukunft doran investéieren.

Well eppes ass kloer - an och dat wësse mer alleguerten, déi e bëssem Erfahrung hu mat den Initiativen, an där sinn der eng Rei heibannen -, all déi, déi de Mëtteg hei geschwat hunn, oder déi hätte kënnen dozou schwätzen, hätten nëmme kënnen soen, datt direkt an indirekt och eis Economie, eis Partner, eist Partenariat dervu profitéieren. Wivill zig dausende ginn investéiert bei Projeten, déi realiséiert ginn? Wivill Leit ginn ausgebilt a gratis Formatiounen, fir duerno kënn vermëttelt ze ginn am Artisanat, am Commerce, an der Industrie, an esou weider? Dat ass e Geldfong, dee mer net schwéier kënn schätzen, deen een awer kann ofmiessen an dëser Saach.

Dëst Gesetz, wat zënter laangem besteet, wéi ech gesot hunn, ass eng Initiativ, déi awer nëmme konnt fonctionnéieren, an déi och op d'Partenariat opgebaut ass. D'Partenariat ass de Schlësselwäert vum Fonctionnéiere vun dësen Initiativen, vun dëse Mesuren, vun dësem Kampf fir de Rétablissement vum Plein emploi.

D'Solidaritéit, déi hei spillt, ass d'Schlësselwuert vun dësem Projet. Et ass d'Partenariat zwëschent dem Stat, zwëschent de Gemengen, awer virun allem och zwëschent dem Artisanat an dem Commerce op där anerer Säit. Hei kréie mer ee gudde Gremium zesummen, eng Plattform, déi genau deenen hëllef, déi et an eiser Gesellschaft brauchen; dat geziilt.

Hei gëtt souzesoen indirekt ee Pakt an der Bekämpfung géint d'Aarbechtslosegkeet geschloss. An hei huet, wéi ech virdru scho gesot hunn, jiddweree positiv Resultater. Hei ka jiddwereen nëmmen derbäi gewannen. Hei kënnen nëmmen d'Kompetenze vun den Demandeure gesteigert ginn. Hei gëtt de sozialen Halt vum Mensch gefördert. An hei ass e wichtege Facteur, e wichtege Punkt fir d'sozial Kohesioun vun eiser Gesellschaft.

Ech wëll vläicht nach kuerz drop agoen, wat dës Initiativen dann elo am Endeffekt fir jiddwereen, schonn zënter Joren an an Zukunft mat Sécherheet nach méi bewosst, nach méi legal op jidde Fall, wäerte maachen.

Éischtens gi se de Leit déi Aarbechtsplazen, datt se hiert Wäertgefill erhalen, datt se am Aarbechtsprozess drableiwen, datt se, wéi ech gesot hunn, moies mussen opstoen an eng kierperlech, eng geeschteg Aarbecht realiséieren.

Si droen derzou bäi, datt eng Aus- a Weiterbildung geleescht gëtt. Awer dat net nëmmen ënnert der klasscher Form, och eng Ausbildung, déi eng Basis huet fir egal wéi ee Beruff.

Et gëtt ganz vill investéiert an d'Santé au travail. Et gëtt ganz vill investéiert an d'Sécherheet. Et gëtt ganz vill investéiert an d'Sproochen. All dës Formations de base kann ee spéider egal a wéi ee Beruff mathuelen. Et sinn also keng punktuell Formatiounen, mä et si generell Formatiounen, déi hei realiséiert ginn an déi fir éiweg wäerten de Kompetenzniveau vun deenen eenzelne Leit steigern.

An der Gesellschaft hunn dës Leit och eng grouss Akzeptanz kritt, well se no bausse gewisen hunn, datt se eng Hand wëllen upaken, datt se wëlle jiddwerengem hëllefen, datt se déi Solidaritéit, déi si kruten, wëllen zrëckginn. Dat gesi mer virun allem dann, wa mer erëm gesinn, wou d'Plaz vun dësen Initiativen ass. Virun allem ass hei de Projet vun der Proximitéit, deen déi eenzel Initiativen hunn.

Een, deen ech ganz gutt kennen, ass virun allem de Projet vum CIGR Wolz an dem OPE, do wou e Service de proximité geleescht gëtt, wou bei eelere Leit, bei kranke Leit, bei behënnerter Leit virun allem och de menschleche Kontakt realiséiert gëtt; dat si Wäerter déi mer an der Wirtschaft net erëmfannen an déi mer hei awer nach eng kéier däitlech erëmfannen. Duerfir ass dat heiten och e Wee, fir eben op deen zweete Volet, deen ech am Ufank ugeschwat hunn, kënnen anzegoen.

Et sinn awer och duerch d'Initiativen nei Besoinen entstanden. Et sinn nei Servicer entstanden, déi wichtig sinn, déi souzesoen nei Zorten, nei Sträng vun der Economie kreéiert hunn. Ob ee se elo Economie solidaire oder aneschten nennt, dat ass egal. Mä et sinn nei Besoinen, nei Aarbechtsplazen entstanden, déi mer an Zukunft richteg wäerte brauchen. Virun allem grad



elo, wou eis Wirtschaft amgang ass zrëck-zegoen.

Derniewent ass awer och dat Partenariat, wat ech ugeschwat hunn, hei erëm indirekt verbonne mat de Placementer. Ganz dacks gëtt mat Stagen an den Entreprisë geschafft, wou d'Leit wierklech, niewent de Virstellungsgespräicher, wou déi Leit ganz dacks schlecht dru sinn, och wa se déi bescht Formatioun vu CVen, vu Virstellungsgespräicher gelescht kréien, kënnen weise wat se kënnen. Dann ass nach ëmmer déi praktesch Ëmsetzung um Terrain an engem Stage, deem dem Patron weist wéi gutt ee Mann ass, wéi engagéiert hien ass a wat fir eng Kompetenzen hien eben an dëser Richtung huet.

Dëst Gesetz wäert massiv all dës Punkten, déi de Moment lafen, ënnerstëtzen an zousätzlech fördern. Et sinn Iddien fir d'Zukunftsvisionen. Mir sollten dës Iddien, dës Initiativen net stoppen. Mä mir sollten dëser Zukunftskichen, déi entsteet, Moyaenë ginn. Mir sollte virun allem elo, wou mer an der Wirtschaft grouss finanziell Investisementer gemaach hunn, och finanziell grouss an de Mënsch investéieren hei.

Virun allem Fongen, déi mer grad dësen Initiativen zur Verfügung stellen, dierfen net nëmmen um selwechten Niveau bleiwen, mä musse grad an dëser Zäit massiv verstärkt ginn. Hei investéiere mer nohalteg an de Mënsch. Hei investéiere mer nohalteg an d'Wirtschaft. Virun allem dat ass ganz wichteg bei dësem Projet nach eng Kéier grad elo eriwwerzeginn.

Fir d'LSAP géif ech zum Schluss nach eng Kéier betounen, datt dëse Projet de loi vun eis déi 100%eg Ënnerstëtzung wäert fannen. Op dem Wee dohin ass et awer fir eis ganz kloer en Zwëscheschrëtt, parallel zu enger Economie solidaire. Eng Economie solidaire, déi an eisem Land soll entstoen an déi derniewent nach bleiwend nohalteg Aarbechtsplaze fir ganz vill Demandeurs d'emploi ka ginn.

Dofir an dësem Kontext e grouse Merci fir all d'Aarbecht, déi gelescht gouf. E grouse Merci no bausse fir all déi Acteuren, déi bis elo um Terrain hei geschafft hunn, déi dës Initiativen um Liewe gehalen hunn an déi d'Iddi vun engem aktive Schaffe géint de Chômage wierklech opgegraff hunn an och wierklech vollstens ënnerstëtzt hunn. An dësem Sënn géif ech mäin a virun allem och den Accord vu menger Fraktioun ginn.

Merci.

» Une voix.- Très bien!

» M. le Président.- Ech soen dem Här Schneider Merci. Als nächste Riednerin ass d'Madame Viviane Loschetter agedroen. Madame Loschetter, Dir hutt d'Wuert.

» Mme Viviane Loschetter (DÉ GRÉNG).- Merci, Här President. Dir Dammen an Dir Hären, dëse Projet de loi huet, wéi et scho beschriwwen ginn ass, e laangen an holperege Wee hanner sech. Dëse Projet de loi huet och schonn e puermol eng 180-Grad-Kéier gemaach. A wat initialement 2003 ugeduecht war, ass op d'mannst zweemol fundamental geännert ginn.

Dat heescht net, datt mir net fannen, datt dëse Projet de loi seng Wichtigkeet, jo souguer seng Richtegkeet huet, mä, Här President, Dir Dammen an Dir Hären, esou radikal Liftingen, wéi dëse Projet de loi der an de leschte sechs Joer erlieft huet, weisen awer dorop hin, datt et eng gréisser Marge de manœuvre gëtt an dëser Beschäftigungs- a Sozialpolitik. Dofir erlaabt mer, ier ech op e puer prezis Punkte vun dësem Projet de loi aginn, e puer generell Remarquen zum politesche Feld vun der Beschäftigungspolitik ze maachen.

Am Koalitionsaccord vun 2004, dee jo elo gläich zu Enn geet, steet zu de Beschäftigungsinitiative Folgendes: datt de Gouvernement conscient ass «que dans la logique d'un cofinancement par le biais du Fonds pour l'emploi, l'objectif premier en est la prise en charge de personnes éloignées du marché du travail, et notamment de chômeurs de longue durée».

Da gëtt schonn de Projet 5144 zitëiert, deemools nach „Lutte contre le chômage social“, an et gëtt gesot, datt den esou amendéiert gëtt zesummen: «en tenant compte des réflexions des acteurs du secteur (...) sans pour autant toucher aux orientations générales du projet, à savoir:» - an da kommen dräi Punkten - «donner une base légale définitive et complète aux organismes gérant des initiatives sociales en faveur de l'emploi» - zweete Punkt - «garantir une efficacité sociale et une transparence financière de ces initiatives» - drëtter Punkt - «assurer, dans ce cadre,

l'accès limité et conditionné aux marchés publics tout en évitant toute forme de concurrence déloyale».

Déi zwee éischt Punkte fanne mer an dësem Projet de loi erëm. Den drëtter Punkt betreffend den Accès conditionné aux marchés publics ass nach verbesserungsbedürftig. Et ass schonn hei gesot ginn: Dësen drëtter Punkt misst eigentlech vun enger Richtlinn, vun engem Choix de société précédéiert ginn. Ech kommen herno nach eng Kéier drop zrëck.

Am Koalitionsaccord vun der Regierung, déi elo op en Enn geet, steet awer och am Chapitre „Economie sociale et solidaire“ Folgendes - an ech zitieren -: «Le Gouvernement est conscient que la réglementation des initiatives sociales pour l'emploi ne saura à elle seule répondre aux aspirations importantes du secteur associatif œuvrant dans le cadre de l'économie solidaire. À cette fin il s'engage à mener une large concertation sur le rôle de l'économie solidaire comme troisième pilier de l'économie et la mise en place d'un cadre légal nécessaire à son développement.»

Här President, vun engem „troisième pilier et la mise en place d'un cadre légal nécessaire à son développement“ si mer nach wäit ewech. Dës Hausaufgab vun dëser Regierung bleift onerledigt. Dës Hausaufgab sollt an engem éischte Moment mat considéiert ginn, notament an dësem Projet de loi. Op alle Fall sollt dëse Projet de loi den Trampolin dofir ginn.

Et ass awer och esou, datt an engem zweete Moment de Ministère de la Famille sech soll dësem Dossier vun der Economie sociale et solidaire unhuelen, ier den Dossier da schlussendlech elo beim Economiesministère gelant ass; wann ech mech esou kann ausdrécken. Dat heescht, haut ass den Economiesministère mat dësem Dossier befaasst, oder zumindest huet hien den Dossier eriwwergererecht kritt.

Här President, Dir Dammen an Dir Hären, haut, wou de rege Benefiss an der Wirtschaft enger anerer Prioritéit Plaz gemaach huet, nämlech déi Prioritéit, wéi mir ons Wirtschaft iwwerhaupt - e bësse salopp ausgedréckt - um Rullen halen, a virun allem wéi mir d'Leit um Aarbechtsmaart behalen, wiere mir gutt bedéngt gewiescht, wa mir endlech och zu Lëtzebuerg eng eescht Diskussioun iwwert d'Plus-value vun enger reeller Economie sociale et solidaire gefouert hätten.

D'Wirtschaften, déi no dësem Prinzip funktionéieren, notament an der Schwäiz oder an Italien, missten dach och eigentlech derwäert sinn zu Lëtzebuerg considéiert ze ginn. Datt dës Form vu Wirtschaftspolitik, Beschäftigungspolitik oder och Sozialpolitik zu Lëtzebuerg net virugedriwwen gëtt, oder emol net analyséiert gëtt, ass schued.

Dëst Manöver, fir dësen Dossier vun engem Ministère an deem anerem eriwwerzschuppen, weist engersäits, wéi vill Politiken dovunner beträff sinn, oder domadder concernéiert sinn, mä dëst Manöver weist och anerersäits, datt sech kee globaalt Bild gemaach gëtt oder gemaach ginn ass vun deem, wat eigentlech eng Regierungsprioritéit misst sinn oder misst gewiescht sinn, wou nëmme vernetzt kann dru geschafft ginn. Iwwerministeriell vernetzt schaffen ass awer bekanntlech net der Regierung hir Stärkt. Dëst ass schued, an dësem Fall ass et bal dramatesch schued. Ech komme méi spéit nach eng Kéier op dëse faméis, an zu Lëtzebuerg scho bal mytheschen drëtter Pilier zrëck.

Ech denken, datt genau dës Schwierigkeet derzou gefouert huet, datt dëse Projet de loi 5144 praktesch sechs Joer gebraucht huet fir seng Identitéit ze fannen, sprich fir sech ze definéieren. Dëse Projet de loi fënnst seng Daseinsberechtigung, andeems hien elo eng Rei wichteg an noutwenneg Mesuren definéiert a reglementéiert. Domadder huet dëse Projet de loi haut dann och elo endlech säi Wee bis an d'Plénière fonnt. Dëse Projet de loi huet, wéi gesot, zumindest dach dee grouse Virdeel, datt e Regeln opstellt, Rechter a Flichte mat de Sanktiounen, wat d'Relatiounen mat de Beschäftigungsinitiativen, au sens large du terme, ubelaangt.

Mir stëmmen an dësem Sënn awer der lichter zynischer Remarque vum Conseil d'État zou, dee gemengt huet, datt dëse Projet de loi dach einfach sollt den Numm droen „Projet de loi relatif à l'organisation et au financement d'initiatives privées en vue de l'intégration de demandeurs d'emploi difficiles à insérer sur le marché du travail“. Dat effektiv mécht dëse Projet de loi, an dat ass och gutt esou, well do war Handlungsbedarf.

Den Numm „Lutte contre le chômage social“, an et ass schonn doriwwer ge-

schwat ginn, war als segregativ erkannt ginn. Den Numm „Contribuant au rétablissement du plein emploi“, schéngt ons e bessen héichtrabend, voire e bessen onrealistes, wëssend, datt mer ëmmer erëm vun engem Pourcentage plutôt stable vu Chômage incompressible schwätzen, dëse souguer am Commentaire des articles beschriwwen ass an effektiv och eng Problematik duerstellt an der Vermëttlung, notament vum Arbeitsamt, mä net nëmmen, och an der Vermëttlung vun de Beschäftigungsinitiativen selwer. Mä, wéi gesot, den Numm vun dësem Projet de loi ass haut net dee Punkt, dee mer beschwätze sollen.

De Rapporteur, deem iwwregens en exzellente schréffleche Rapport virgeluecht huet, schreift zu Recht, datt ee muss tëschent Chômage conjoncturel - dee Chômage, deem ons an Zukunft méi Kappzerbrieche wäert gi wéi bis elo - an dem Chômage structurel differenzéieren - deem Chômage, dee mer virun allem an dëser Form vu Beschäftigungspolitik erëmfannen. An effektiv beschäftegen all Variante vu Beschäftigungsinitiativen éischer Leit, déi vum strukturelle Chômage beträff sinn, an dat aus ville verschiddenen Ursaachen.

Dëst si meeschtens Chômeuren, zu engem Drëtter och Chômeuses de longue durée, Leit, déi parallel zu hirem Chômageproblem och nach aner schwéier Problemer hunn, Leit aus schwierigem sozialen a kulturelle Milieu, och jonk Leit, an ëmmer méi ouni iergendeng Ausbildung, vill Leit, déi, wann iwwerhaupt, oft nëmmen hir obligatoresch Scolaritéit ofgeschloss hunn, Leit, déi nach net laang am Land sinn, Leit, déi aus gesondheetleche Grënn hir Aarbecht verluer hunn an esou weider.

Dës Form vu Beschäftigungsinitiativen, wéi se hei beschriwwen sinn, an déi et jo scho ginn - et ass scho vu menge Virriedner hei laang doriwwer geschwat ginn -, suert ouni Zweifel fir eng mënschwerdeg Aarbechtsbeschäftigung fir deem eenzelne Betreffenen, mä leescht awer och eng net ze ënnersätzend Aarbecht fir d'Gesellschaft. Net zulescht well si duerch dat, wat si ubidden, e groussen Deel zum Erhale vun der Cohésion sociale hei an dësem Land bäidroen.

De Projet de loi gesäit vir, datt och déi sougenannte privat Betriber, déi sech de Konditiounen stellen, an doduerch och en Agrément via enger Konventioun mam Ministère du Travail et de l'Emploi kréien, och kënnen mat considéiert ginn. Dëst zielt notament och fir d'Gemengen. Am Kloeertext heescht dat, datt eigentlech all Employeur, deem d'Konditiounen erfëllt an dee wëllt eng Convention de coopération mam Ministère du Travail et de l'Emploi agoen, ka säin Deel derzou bäidroen, fir deem engen oder deem anerem Demandeur d'emploi de Schrott an d'Aarbechtswelt ze erliichten. Mir denken, datt et wichteg ass dat ze ënnersträichen. Jiddweree kann, wann e wëllt, an eng gewësse Form vu sozialer Verantwortung kommen.

Schlussendlech gehéiert dës Approche usazweis zu engem Choix de société. Dee Choix de société, vun deem ech virdu geschwat hunn. Effektiv kënnen a solle Betriber, all Form vu Betriber, sech an Zukunft méi oder méi oft mat ëm dat këmmen, wat an der Gesellschaft passéiert, ugefaange bei de Léierjongen a Léiermeedercher, eriwwer bei d'Femmes rentantes, esou laang et der dann och nach ginn, Matmënsche mat Behënnerung oder mat Besoins spécifiques, an och déi Mënschen, déi versichen erëm op den Aarbechtsmaart ze kommen.

Dann ass et och duerchaus berechtigt, an et ass och schonn hei gesot ginn, datt dës Betriber, ënner enger gewësser Form, vum Pouvoir public ënnerstëtzt ginn. Esou eng Virgoensweis gesinn Déi Gréng als duerchaus sënnavoll un, an net als Concurrence déloyale. Wéi gesot, et ass net de rege Kapitalismus an de rege Benefiss wat d'Wirtschaft um Liewe wäert halen. Grad esou wichteg ass, datt eng Gesellschaft am Alldag ka funktionéieren, datt hir Membere kënnen schaffen goen, hir Pai kréien a mat deene Suen hiert Liewe gestalten kënnen. Ouni dës Viraussetzung funktionéiert och keng Wirtschaft.

Mir hu vill an och laang an och gutt mateneen diskutéiert an debattéiert an der zoustänneger Kommissioun, a mir waren ons och all eens, datt mer net kéinten engem Projet zoustëmmen, deem de Mënsch als Demandeur d'emploi definitiv a Kategorien andeelt, mat där Konsequenz, datt d'Kategorie ausschlaggebend ass fir d'Méiglechkeet, déi ugebuede gëtt. Dat heescht, datt deemno, a wéi eng Kategorie ee fält, gegebenenfalls eng Exklusivitéit oder eng Ausgrenzung vu Méiglechkeeten méiglech gewiescht wier.

Dee Wee, dee mer elo ageschloen hunn, nämlech dee Wee vun engem „population mix“, wéi dat elo anglophonesch heescht, ass e realistesch an ëmsetzbaren och fir d'Betriber, sprich fir d'Beschäftigungsinitiativen. D'Dynamik, déi an enger gemëschter schaffender Populatioun entsteet, ass sécherlech eng méi gesond, esou laang se gutt encadréiert gëtt. De System vum „population mix“ erlaabt et eng kloer Segregatioun ze ëmgoen.

Et ass scho schwéier genuch de Stempel vum Demandeur d'emploi ze hunn. Leider ass et esou, datt den Demandeur d'emploi nach ëmmer mat enger negativer Connotatioun muss liewen. Eng Aart Scholdgefill, bedéngt duerch de Bléck, deem d'Gesellschaft nach ëmmer op den Demandeur d'emploi werft. Et wäert wahrscheinlech och haut nach schwéierfale, dëse Bléck vun der Gesellschaft fortzekréien, obwuel mer haut wëssen, datt d'Schold, sprich d'Ursach vun der Aarbechtslosegkeet vun enger Persoun ganz aner Originé kann hu wéi beim Concernéierte selwer. De Concernéierten, deem oft nëmme säin neie Status zur Kenntnis huele kann.

An dësem Kontext fanne mer och déi Leit erëm, déi an engem Kontrakt CIE, respektiv CAE, an enger Mesure sinn; déi Mesuren, déi mer iwwert d'Gesetz 5611 agefouert hunn. Am Kader vum Gesetz 5611 „pour le maintien dans l'emploi“ war de Service „SAPDE“ vum Arbeitsamt geschafe ginn. Dëse Service sollt déi Leit, déi mer méi spezifesch an dësem Projet de loi hei erëmfannen, méi individuell begleeten a suivéieren. Et si Posten an dësem Service duerfir geschafe ginn, awer an de Considérations générales vum Rapport sinn dëse Service a seng Missiounen och beschriwwen. Or existéiert dee Service en tant que tel net méi um Arbeitsamt. Do ass schonn en Deel Ëmstrukturéierung geschitt.

Mir kéinten ons do gewësse Froen stellen iwwert d'Garantié vun enger optimaler Zesummenaarbecht tëschent den entre Guillemeten „Employeurs“, dat heescht all deene Leit, déi esou eng Konventioun matmaachen, an dem Arbeitsamt. Si mer sécher, datt d'Arbeitsamt déi noutwendeg Ënnerstëtzung un den Demandeur d'emploi respektiv déi noutwendeg Kommunikatioun mat deem Employeur ka garantéieren?

Här President, vu datt ech Froen un de Minister stellen, erlaabt mer just eng Minutt ze waarde bis de Rapporteur vun dësem Projet fäerdeg ass mam Minister ze schwätzen, da kann ech meng Froen un de Minister stellen.

» Plusieurs voix.- Ooohhh!

» M. le Président.- Madame Loschetter, fuert Dir virun! De Minister ass ganz hellhéiereng.

» Mme Viviane Loschetter (DÉ GRÉNG).- Ech stellen einfach e puer Froen.

(Interruptions)

Si mer sécher, Här Minister, datt d'Zesummenaarbecht tëschent dem Arbeitsamt an de Responsabelen an de Betriber, déi sech ëm déi heite Leit këmmen, qualitativ garantéiert ass? Si mer och sécher, datt den administrativen Opwand - mir hu schonn doriwwer geschwat - net déi potenziell Beschäftigungsinitiativen oder net déi potenziell Betriber wäert ofschrecken, esou eng Konventioun anzegoen? A wat kënnen mer deenen als Garantie ginn, datt deem administrativen Opwand awer an de Méiglechkeeten vum Betrib bleift respektiv ënnerstëtzt gëtt vun notament Leit vum Arbeitsamt?

Déi Responsabel an de Betriber musse sech un der Evaluatioun och bedeelegen. Si mer do sécher, datt si gutt doriwwer informéiert ginn, informéiert sinn, voire forméiert sinn, forméiert ginn? A si mir sécher, datt déi erstallten Informatiounen och richtig weidergeleet ginn an och richtig benotzt ginn zum Wuel vum concernéierten Demandeur d'emploi?

Dëst sinn alles Erausforderungen, déi onsem Wëssen no jo och vun der ADEM musse gelescht ginn, oder? Sinn dës prezis Missiounen elo an deem Deel Ëmstrukturéierung kloer definéiert an opgedeeelt um Arbeitsamt? Kann d'Arbeitsamt



sech dëser Missioun direkt stellen, wa mir dee Projet haut stëmmen?

Här President, Dir Dammen, Dir Hären, wéi gesäit d'Zukunft vu verschidde méi schwéier vermëttelbaren Demandeurs d'emploi aus? Ass et gutt respektiv richtig, wann e schwéier vermëttelbaren Demandeur d'emploi definitiv seng Aarbechtszukunft an enger Beschäftigungsstruktur fënnt a wa seng Pai à long terme géif vum Fonds pour l'emploi finanzéiert ginn? Wéi gétt dëst an der Praxis geregelt? A wéi kann et an engems och der Richtlinn vun dësem neie Gesetz gerecht bleiwen, nämlech dem Rétablissement du plein emploi?

Wat wieren d'Alternativen dozou? Bleift de schwéier vermëttelbaren Demandeur d'emploi definitiv am sougenannten zweeten Aarbechtsmaart? Misste mer net dem sougenannten zweeten Aarbechtsmaart aner oder nei Perspektive ginn?

Woubäi ech dann erëm zréck wëll kommen op d'Opbauen an d'Ausbaue vun enger reeller Économie sociale et solidaire zu Lëtzebuerg, engem reellen drëtte Pilier nieft dem Secteur public an dem Secteur privé. Erlaabt mer lech drun ze erënneren, datt et 2005 en Ufank vun enger breeder Diskussioun ronderëm d'Économie sociale et solidaire zu Lëtzebuerg gouf. Notamment duerch d'Kreatioun vun enger Plattform, déi praktesch all A.s.b.l.-Institutioun, Coopérative an esou weider rassembléiert huet. Dës Plattform existéiert leider net méi als sollech, wat mir extrem bedauern. Onser Meinung no ass do eng Chance vläicht verpasst gi fir déi noutwendeg Ënnerstëtzung unzëbidden, fir déi Diskussioun, déi och zum Deel kontradiktoresch a schwiereg tëschent alle Membere vun der Plattform gi wier, ze ënnerstëtzen.

Op alle Fall, den Débat war lancéiert an déi zoustänneg Ministären a Ministeren hu sech och dunn zu Wuert gemellt. Eng interessant an och opschlossräich Etüd ass 2005 vum Statec entaméiert ginn; virdu war och schonn eng 1993, mä ech denken, déi ass awer e bëssen al fir dat, wat mir haut brauchen. D'Direktioun vum Statec hat sech 2005 bereet erkläert, fir méi pousséiert Analysen ze maachen an den Impakt vum Potenzial vun der Économie sociale et solidaire zu Lëtzebuerg ze ënnersichen.

(M. Lucien Weiler reprend la Présidence)

Net nëmme méi de strukturelle Chômage wäert ons hei zu Lëtzebuerg beschäftegen, mä och de konjunkturelle Chômage wäert an Zukunft ëmmer méi ons besuergen, Här President, dat brauch ech kengem, an dem Minister heibanne scho guer net ze soen. Mä mir wäerten och net ëmmer an net ëmmer nëmme mat Kuerzaarbecht drop äntwerte kënnen. Net nëmme méi de Kapitalinvest, mä ëmmer méi de mënschlechen Invest wäert e wichtege Deel vun der Économie de marché ginn. Et géllt Vernetzung schafen tëschent dem Kapitalinvest an dem mënschlechen Invest, déi funktionéieren. Dësen Erausforderunge kann nëmme e Regierungsprojet begéinen, e Projet vun enger ganzer Regierung. D'Économie sociale et solidaire muss als Standbeen vun der Wirtschaftspolitik a vun der Beschäftigungspolitik entwéckelt ginn.

Au risque de me répéter, wëll ech a menger Konklusioun ënnersträichen, datt et definitiv géllt effizient an effikass Vernetzungen ze schafen tëschent den eenzelne Mesuren, där Hällewull vu Mesuren, déi mer hunn. Mä et géllt och politesch Vernetzung schafen tëschent den zoustänneg Ministären Économie, Éducation, Famille, Travail a wuel och Sécurité sociale. Et géllt och Vernetzung schafen an Zesummenaarbecht garantéiere mat alle Forme vu Beschäftigungsinitiative mat de Betriber, awer och mat de Betriber an der fräier Maartwirtschaft. Ouni si an hir Kollaboratioun wäerten déi weéngst Beschäftigungsmesurë gräifen.

An dann eng lescht Recommandatioun an aller Bescheidenheet: Wien a wat seet ons, datt all dës Mesurë gräifen? Ugefaange bei de Mesuren aus dem PAN-Gesetz 1999, déi heiansdo adaptéiert gi sinn, d'Gesetz 5611 aus dem Joer 2006, déi eenzel Ëmstrukturéierungen, notamment um Arbeitsamt, an esou weider. Wuel hu mer Etüde vun der OCDE oder vum BIT, déi ons zum Deel kloer

Recommandatiounen ginn. Ons Iwwerleeung geet awer éischter an d'Richtung: Ass e Plang opgestallt ginn, wou all Mesurë mat den Zilsetzungen a virun allem mat den noutwendegen Indicateuren, fir erauszefannen, wat gräift, wat net, wéi vill, firwat, wou muss een den Hiewel anescht usetzen, opgeléscht sinn? Mat Statistike geet et jo net méi duer. Ech denken, dat contestéiert kee méi heibannen.

Zum Schluss wënschen ech all deene Leit, deenen engen, déi vun de Beschäftigungsinitiative Gebrauch maachen, awer och deenen, déi dës Mesuren offrëiere mat ganz vill Engagement, eng glécklech Hand an eng Bonne chance. Well een e bësse Chance brauch an dësem Dossier, denken ech, e bëssen ouni Chance an dësem Dossier wäert et mat Sécherheet net goen. Jiddweree brauch also e bësse Chance op senger Sich no enger Aarbecht.

Mir wäerten op alle Fall dësse Projet matstëmmen an ech soen lech Merci fir d'Nolauschteren.

» Plusieurs voix.- Très bien!

» M. le Président.- Merci, Madame Loschetter. Fir d'ADR schwätzt elo den honorabelen Här Gibéryen.

» M. Gast Gibéryen (ADR).- Merci, Här President. Léif Kolleeginnen a Kolleegen, och vun eiser Säit aus e Wuert vu Merci un de Kolleeg Ali Kaes fir souwuel säi mëndleche wéi schrëftleche Rapport zu dësem Projet.

Erlaabt mer vläicht eng prinzipiell Bemierkung. Mir hu vill Kolleegen heibannen, och de Kolleeg Ali Kaes ass Buergermeeschter. Wann an enger Gemeng e Projet um Ordre du jour steet, deen eng Organisatioun oder e Betrib befaasst, wou een och nach President dervunner ass, dann dierf een am Prinzip an där Gemengerotssitzung d'Wuert net ergräifen an et dierft een emol net am Sitzungssall sinn.

D'Chamber fonctionnéiert awer laut enger anerer Deontologie. Wann hei e Kolleeg d'Wuert ergräift oder Rapporteur ass, dann ass dat konform zum Gesetz an et ass trotz allem awer ëmmer legal.

Här President, dee Projet, dee mer haut hei diskutéieren, befaasst sech haaptsächlech mat der Problematik vum Chômage. Déi Problematik hei zu Lëtzebuerg, wou mer eis ëmmer konnten am internationale Vergläich am Fong dermat rühmen, datt mer konnte soen, de Chômage ass hei zu Lëtzebuerg wäit ënnert der Moyenne, en ass niddreg. Mir hu souguer deelweis nach virun e puer Joer vu Vollbeschäftegung geschwat, wéi de Chômage bei engem bis zwee Prozent louch.

Mir wëssen awer, datt mer keng Insel sinn an datt de Chômage an deene leschte Méint hei zu Lëtzebuerg geklommen ass. A mir wëssen opgrond vun der wirtschaftlecher aktueller Situatioun, déi mer hei am Land hunn, datt de Chômage wäert an deenen nächste Méint a Joren nach ukammen. Ech fäerten, an déi meescht vun eis heibanne wäerten do astëmmen, datt mer och hei zu Lëtzebuerg wäerten eng Kéier, an an net allze laanger Zäit, vu vläicht 15.000 oder 20.000 Chômeure schwätzen.

Lëtzebuerg huet eng spezifesch Situatioun, well mir e Land sinn, wat kleng ass, wat eng grouss Grenzregioun huet, wou de Chômage och héich ass an domadder automatesch den Drock op eisen Aarbechtsmaart vun der Grenzregioun grouss ass. Virun allem déi onqualifizéiert Leit kréien duerfir a priori, net wéinst de Frontalieren, mä opgrond vun hirer Onqualifikatioun Problemer, fir um éischten Aarbechtsmaart kënnen eng fest Aarbecht ze fannen.

An der Geschicht, wa mer 30 bis 40 Joer zréckkucken, war eis Économie aneschtens opgebaut. Mir haten dunn nach vill Industrien. Ech erënneren zum Beispill drun, wéi deemools an der Stolindustrie nach op der ARBED 30.000 Leit beschäftegt si ginn, hate mer och vill Leit, déi eng Qualifikatioun haten, awer och Leit, déi keng Qualifikatioun haten, déi mer an den Industrien deemools ënnerkruten.

Haut ass et esou, datt och an deenen Industrië praktesch onqualifizéiert Leit keng Chancé méi hu fir eranzekommen, mä mir hunn déi Leit awer nach alleguer, an déi sinn nach ëmmer um Aarbechtsmaart do. Wa mer dann och nach gesinn, datt bei de Leit, déi um Aarbechtsmaart ageschriwwen sinn, iwwert d'Halschent praktesch iwwerhaapt kee Schoulofloss huet oder just déi obligatoresch Schoul hanneru sech bréngt, da wësse mer ganz genau, wou de Problem ass. Onqualifizéiert Leit hunn haut a wäerten an Zukunft ëmmer méi Problemer kréien, fir iwwerhaapt nach eng Chance op eise Aarbechtsmaart ze kréien.

Mir hu gëschter an haut heibanne vill iwwert d'Schoul geschwat, an ech mengen, da muss een och soen, wa mer hei zu Lëtzebuerg esou vill Leit hunn, déi keng Qualifikatioun hunn, déi just déi obligatoresch Schouljoren hanneru sech hunn, dann ass dat och e Resultat vun eise Schoulsystem, wat mir iwwer Jorzéngten hei zu Lëtzebuerg haten an och nach hunn. Mir perséinlech fäerten - an de Kolleeg Mehlen huet dat gëschter an haut hei zum Ausdrock bruecht -, datt mer och mat där neier Reform, déi mer elo gestëmmt hunn, nach net déi fundamental Reforme wäerte realiséiert kréien, déi dréngend noutwendeg sinn.

En anere Phenomeen, dee mer hei zu Lëtzebuerg hunn, dat ass, datt mer eng Rei vu Wirtschaftssecteuren hunn, wou mer praktesch och keng Lëtzebuerger dra fannen, wou et nach vläicht an der Mentalitéit vun de Leit ass, datt déi Aarbechtsplazen, ech weess net, vläicht ze schéin, ze gutt oder ze schlecht sinn, fir datt de Lëtzebuerger dra schafft. Ech denken do un d'Handwierk, ech denken un de Bau, d'Restauratioun oder d'Hotelbranche.

Wann Der en Entrepreneur hutt, deen aus Däitschland hei an d'Land schaffe kënnt, dann huet dee praktesch gréisstendeels, wann een emol esou op de Chantier geet an et lauschtert een, Leit aus Däitschland bei sech beschäftegt. Datselwecht fannt Der och bei deenen, déi aus Frankräich oder aus der Belsch kommen. Mä bei eise Lëtzebuerger Entreprisé fanne mer dat ganz weéng.

Dat heescht also och, mengen ech, datt mer hei zu Lëtzebuerg e Mentalitéitswiesell misste kréien, souwuel op der Salariatssäit wéi op der Patronatssäit, datt all Aarbecht, déi do ass, eng wichteg Aarbecht ass, eng wäertvoll Aarbecht ass an och duerfir vu jiddwerengem ka benotzt ginn. Duerfir mengen ech musse mer och dohinner méi drécken, fir dat erëm an d'Diskussioun ze bréngen, datt och an deene Secteuren do eiser Leit erëm mussen Aarbechten unhuelen a schaffe goen. Et gétt keng Aarbecht, déi onwierdeg ass, fir musse gemaach ze ginn.

Als éischt Zil an all eisen Iwwerleeunge muss ëmmer bleiwen, datt mer d'Leit an den éischten Aarbechtsmaart integréiert kréien. Mir wëssen awer, an dat ass de Mëtteg hei vu menge Virriedner schonn des Öfters gesot ginn, datt, egal wat fir eng Moosname mer ergräifen, ëmmer eng Rei vu Leit - ech well net soen, eng Kategorie vu Leit, mä eng Rei vu Leit - bleiwen, déi einfach a keen Aarbechtsprozess ze integréiere sinn, op jidde Fall net direkt.

Duerfir musse mer dann och Méiglechkeete fir déi Leit ubidden, fir deenen eng Beschäftegung ze ginn, well soss d'Gefor vun der sozialer Ausgrenzung bleift. Dat ass dat Schlëmmst, wat een engem Mënsch kann undoen. Wann e guer keng Beschäftegung huet, dann ass déi sozial Ausgrenzung do, mat alle Konsequenze fir seng Famill, fir d'gesellschaftlecht Liewen, well mer déi Leit un de Rand vun der Gesellschaft drängen. Da musse mer eis och iwwert déi Konsequenzen, déi doraus entstinn, bewosst sinn.

Eng vun dëse Méiglechkeete sinn déi an de vergaangene Jore gegrennte Beschäftigungsinitiativen, wou d'Leit da konnte beschäftegt ginn, encadréiert ginn, forméiert ginn, mat dem Zil, fir se erëm an den éischten Aarbechtsmaart ze integréieren. De Kolleeg Romain Schneider huet dat am Detail hei ganz gutt erkläert. Dës Beschäftigungsinitiative sinn a priori vun de Gewerkschaften, vum OGB-L a vum LCGB gegrennt ginn, an d'Liewe gesat ginn: Objectif plein emploi, ProActif, Forum pour l'emploi. De Prinzip dovunner ass richtig an ass och gutt.

Och wann dës Initiativen Ulafschwieregkeeten haten, an ech wëll net dorobber eragoen, et ass ëmmer Rieds gaangen, eng Diskussioun gi vun enger deloyaler Konkurrenz. Mir hunn elo kierzlech en Uerteel kritt am Kader vun de Soumissiounen, wou d'A.s.b.l.en am Fong net dierfte bei Soumissiounen participéieren. Ech mengen, d'Ursaach war, well se staatlech subventionéiert ginn. Et ass iwwert d'Transparenz an der Finanzéierung diskutéiert ginn. Ech selwer hunn an där Fro eng Rei vu Questions parlementaires gestallt, ginn haut awer net méi dorobber an.

De Projet de loi, Här President, huet eng Rei vu wesentlechen Ännerunge bruecht. Si si scho vu menge Virriedner och de Mëtteg hei zum Deel oder praktesch alleguer ernimmt ginn. Wichteg ass een éischte Punkt, d'Gläichstellung tëschent deene sougenannte Beschäftigungsinitiativen an de Betriber. Et soll einfach der deloyaler Konkurrenz entgéintgewierkt ginn. Bei de Betriber kënnen dat och Gemenge sinn, dat

ass och schonn de Mëtteg gesot ginn, esou wäit wéi déi Betriber oder d'Gemengen en Agrément beim Aarbechtsminister hunn. Da kënne se och vun all deene Konditiounen an deene Subventiounen, déi an dësem Gesetz virgesi sinn, profitéieren.

Hei stellt sech allerdéngs eng éischt Fro. Ech hunn elo grad gesot, datt mer en Uerteel kritt hunn, datt d'A.s.b.l.en net méi dierften a Soumissions publiques matmaachen, well se eben och iwwert de Stat eng Subventioun kréien. Ass dat dann och elo fir Betriber, wann déi mat dem Aarbechtsministère en Agrément hunn an do jo dann och eng Ënnerstëtzung kréien? Falen déi dodrënner? Den Här Minister, Här President, wëllt direkt dorop äntwerten.

» M. François Biltgen, Ministre du Travail et de l'Emploi.- Dat ass eng technesch Fro, esou dass ech déi léiwer elo einfach ganz séier beäntworten, an herno maachen ech just e puer politesch Aussoen.

» M. Gast Gibéryen (ADR).- Jo, jo.

» M. François Biltgen, Ministre du Travail et de l'Emploi.- Also, dat Uerteel muss ee liesen. Dat Uerteel seet net, dass déi A.s.b.l.en net kënnen de Marché public matmaachen, well se Konventiounen mam Aarbechtsministère hunn. Si hunn einfach d'Form vun der A.s.b.l.; déi autoriséiert net, de Marché public matzemaachen. Dat ass déi eenzeg Fro, déi an deenen Uerteelen do gekläert ginn ass. Ech wollt dat soen, well dat Uerteel wäert nach vill kommentéiert ginn, fir dass awer kloer ass, wat dann am Uerteel steet a wat net drasteet.

» M. Gast Gibéryen (ADR).- Dann ass dat kloer. Dat heescht also och, datt déi Fro, déi ech hei opgeworf hat, domadder beäntwert ass, datt also d'Betriber net doduerch e Problem kënne kréien.

Dat Zweet ass, datt mer e legale Kader schafen, wat d'Finanzéierung ubelaangt. Mir fannen dat positiv. Da kréie mer Transparenz an déi Dossieren eran.

Eng drëtt Feststellung ass, datt mer heiduerch elo Feststellungen bei de Leit kréien. Bis elo war et bei de Beschäftigungsinitiativen am Prinzip esou, datt no zwee Joer déi Leit hätten am Fong missen an dem éischten Aarbechtsmaart integréiert sinn oder si sinn erëm erausgefall. Ech wëll och net dorop agoen, wat déi Leit do hu misse maache vläicht, fir vun där enger op déi aner Plaz ze goen, fir nach weider Recherchen ze maachen. Elo gi mer hin a mir ginn eng definitiv Astellung. Dat ass a priori eng gutt Saach.

Mä wa mer dat awer méi an eis zergoe loosse, da gesi mer awer, datt do eng Rei vu Problemer opkommen. Éischstens mengen ech muss een emol soen, datt dat vläicht en Ageständnis ass vum Échec, dee mer an der éischter Phas haten, wou mer deemools nach dervun ausgang sinn, datt mer de Gros vun de Leit no zwee Joer agestallt kriteren, elo awer feststellen, datt mer déi Leit net agestallt kritt hunn, an duerfir soen: Ma da gi mer elo op en definitiven Aarbechtsvertrag iwwer.

Esou wäit kann een dat verstoen. Et muss een awer da wëssen, datt domadder och den Échec vum éischte System dokumentéiert ass. Et ass mir och net bekannt, datt kloer Statistiken do sinn, wéi vill Leit datt dann elo konkret an den éischten Aarbechtsmaart - ech betounen dat: an den éischten Aarbechtsmaart - konnten integréiert ginn, an ob och vläicht déi Statistik opgedeelt ass, wat fir eng op hir eegen Initiativ respektiv op d'Initiativ vun den A.s.b.l.en zréckzeféieren ass. Dat geet menger Meinung no net kloer do ervir.

Mä dat ass och net de Problem. De Problem, dee mer hunn, ass, datt sech d'Fro awer stellt: Wa mer elo Leit definitiv astellen, wat maache mer mat deene Leit, wa se dann eng Aarbechtsplaz um éischten Aarbechtsmaart ugebuede kréien? Déi Leit hu jo dann en definitiven Aarbechtsvertrag a si falen ënnert d'Aarbechtsrecht. Déi Leit kënne kënnegen oder mussen op där anerer Säit, wa se net kënnegen, gekënnegt kréien. A wat ass dann d'Motiv fir esou eng Kënnegung? Do schéngt eis e Problem ze leien.

Den zweete Punkt, dee mer hunn, dat ass deen: Hunn déi Leit iwwerhaapt nach, wa se eng fest Ustellung bei enger A.s.b.l. hunn, en Intérêt, fir um éischten Aarbechtsmaart ze sichen? Mir fäerten, dat allegueren déi Leit sech herno betruechte quasi wéi e beschäftegte Statsaarbechter, well jo dach awer déi ganz Finanzéierung iwwert de Stat ofgeséichert gétt a si hunn eng definitiv Astellung. Den Här Minister wëllt och dorobber direkt eng Äntwert ginn.



**Mercredi,  
21 janvier 2009**

» **M. Aly Jaerling** (*Indépendant*).- Neen, en huet mech jo gefrot, ob et och falsch Initiative gëtt. Ma déi falsch si mer elo amgaang ze kreéieren. Fir mech sinn dat keng Beschäftigungsinitiativen, wéi ech gesot hunn. Meng Bedenke ginn an déi Richtung, dass dat hei bëlleg Aarbechtskräfte gi fir d'Betriben.

Déi aner Fro, déi ech mer vun Ufank un ëmmer gestallt hunn, ass: Wann den Agrément kënnt vum Ministère an et gëtt esou eng Initiativ geschafen, wat ass de Lien zum initiale Betrib? Do ass keen do! Dat heescht, et ass am Fong eng Struktur vun engem Betrib à part. Eng Struktur vun engem Betrib à part, wou d'Leit kënne geholl ginn an dann och nach un aner Betriben verléint ginn, op Käschte vum Steierzueler.

Ech wëll awer Folgendes soen: Den Här Krieeps huet no der Fiche financière hei gefrot. D'Fiche financière ass am Fong fir mech hei net dat Wichtigst an där Diskussioun, well mer souwisou déi Leit musse bezuelen. Dat ass kloer. Ech mengen, se ginn ëmmer vum Fonds pour l'emploi bezuelt.

Hei ass et just elo esou, dass een dem Patronat d'Geleeënheet gëtt, wa si esou eng Beschäftigungsinitiativ grënnen, fir ebe fir 15% vum Mindestloun dat do ze maachen. Dat muss ee soen, well 85% gi vum Stat iwwerholl, dat heescht, et gëtt fir 15% vum Mindestloun geschafft.

Dat ass de Fazit. Ech ka mer net virstellen a gesinn och net, dass dat hei soll elo e risegen Aarbechtsmaart fir sech ginn. Duerfir kann ech mer net virstellen, dass vill Betriben op dee Wee ginn, well eben am Gesetz d'Dispositioun dran ass vun der Mixitéit. Dat heescht, dass si mussen och eng Rei Leit huelen, déi néierens méi beschäftegt ginn. Dat ass am Fong deem eenzege Punkt, wou ech soen, duerfir gesinn ech d'Gefor net esou, dass da vill esou eng Initiativ grënnen. Ech ka mir dat net virstellen, well de sozialen Engagement vun de Patronen, dee gesi mir jo all Dag, an dee gesi mir an der lescht ëmmer méi, an duerfir maachen ech mir doriwwer och weider keng Gedanken.

Mä, wat awer fir mech ausschlaggebend ass: Wou ass d'Obligatioun fir de sozialen Encadrement, wéi dat bei deene richtege Beschäftigungsinitiativen ass?

Deen ass net garantéiert, an dat ass fir mech och e Problem. Dat Eenzegt wat hei garantéiert ass: Hei kënnen Initiative gegrënnt ginn, déi fir 15% vum Mindestloun kënne Leit beschäftegen. Dat ass dat eent.

Nach eng Sekonn, Här President.

Dat anert ass och dat mat der Hierarchie. Déi Leit gi mam Mindestloun beschäftegt, mä do sinn och Leit an déi Beschäftigungsinitiativen erakomm, déi zum Beispill eng Qualifikatioun hunn. Deenen hir Qualifikatioun gëtt net berücksichtegt, obwuel dass si schonn eng Qualifikatioun matbréngen.

An dann ass nach eng aner Saach, d'Motivatioun: Wann een de Mindestloun kritt, fir nach eng Motivatioun ze hu fir op den initialen Aarbechtsmaart ze kommen.

Ech géif mengen, wann ee méi verdéngt um initialen Aarbechtsmaart, ass dat ëmmer Motivatioun genuch. Mä wann een awer hei seet, et ass keng Motivatioun do, da muss een awer och dann d'Äntwert drop ginn: Schaaft een dann eng Motivatioun, wann ee wëllt manner gi wéi de Mindestloun, oder wat fir eng Motivatioun kann ee schafen?

Wann een eng Qualifikatioun kritt, fir dobausse méi ze verdéngen, dann ass eng Motivatioun do, mä am anere Fall besteet de Risque, dass Leit laang an där Beschäftigungsinitiativ bliwen. Duerfir soen ech, de sozialen Encadrement ass net ginn, an d'Kontrollmoyenen, ob dann och elo déi Leit net just benotzt ginn als bëlleg Aarbechtskräften, sinn och net ginn.

Ech soen lech Merci.

» **M. le Président**.- Merci, Här Jaerling. Domat ass d'Diskussioun ofgeschloss an d'Regierung huet d'Wuert. Den Här Aarbechtsminister François Biltgen huet d'Wuert.

» **M. François Biltgen**, *Ministre du Travail et de l'Emploi*.- Här President, Dir

wereen esou arrogant mat deene Leit, déi keng Schaff hunn, wéi Dir!

» **Plusieurs voix**.- Ouuhhhh!

» **Une voix**.- Géift Der kucken, dass d'Leit eng Schaff kriteen...

(*Brouhaha général*)

» **M. Aly Jaerling** (*Indépendant*).- Här President, soll ech nach e bësse waarden?

(*Brouhaha général*)

» **M. le Président**.- Jo. Här Jaerling, sot Äre fréiere Kolleegen, wann Dir si géift stéieren, da géift Der waarden, bis dass si hei fäerdeg sinn.

(*Hilarité*)

» **M. Aly Jaerling** (*Indépendant*).- Här Gibéryen, haalt se emol fënnef Minutten zou!

(*Hilarité générale*)

» **M. le Président**.- Här Jaerling, kommt, mir si korrekt!

» **M. Aly Jaerling** (*Indépendant*).- Esou hunn ech et ëmmer gemaach.

» **M. le Président**.- Ech hätt gär, dass mer hei korrekt géife mateneen ëmgoen, an duerfir ass et elo esou, dass den Här Jaerling d'Wuert huet.

» **M. Aly Jaerling** (*Indépendant*).- Also mir si jo Kolleegen, mir kënnen eis dat soen, wat mer fir richtig halen.

» **Une voix**.- Wow!

» **M. Aly Jaerling** (*Indépendant*).- Här President, mir kommen eis awer ëmmer méi no. Alles vergësst sech lues a lues.

Här President, ech wëll och dem Här Rapporteur Merci soe fir säi Rapport, deem am Fong alles erëmginn huet, wat de Projet hei mat sech bréngt, an och all déi Aarbechten, déi an der Kommissioun jo net einfach waren. Ech mengen, dat wësse mer alleguer. Et ass keen einfache Sujet. Well hei e Problem ass, wou ech awer nach ëmmer meng Bedenke behalen, dat ass, dass mer soen, mir wëllen d'Concurrence déloyale e bëssen ofschafen, a meng Bedenke ginn an déi Richtung, dass déi Concurrence déloyale an déi aner Richtung geet. Dat heescht, dass am Fong e bësse Concurrence déloyale fir de soziale Beräich hei geschafe gëtt.

Wat elo den Här Rapporteur selwer ubelaangt, esou war ech e bëssen erstaunt, net vun Ufank un, mä elo hunn ech et net gutt fonnt, wann een, dee selwer President ass vun enger Beschäftigungsinitiativ, hei iwwer e Sujet schwätzt, deem en am Fong direkt betrëfft. Ech hunn dat net gutt fonnt. Et ass en anere President vun enger Beschäftigungsinitiativ heibannen, deem aus deontologesche Grënn net hei d'Wuert ergraff huet, dat eiert en - onbedéngt! -, mä wéi gesot, den Här Gibéryen huet gesot, et ass legal, an duerfir: Kommt, mir kucken dann einfach guttwëlleg doriwwer ewech.

Meng Bedenke bei dem Projet - ech hunn déi och schonn an der Kommissioun ervirbruecht -, dat ass, dass mer hei net en Instrument schafen am Kader vun enger Économie solidaire, déi de Patronen am Fong un éischter Stell bëlleg Aarbechtskräfte liwwert.

Dat heescht, bëlleg Aarbechtskräften, wou menger Usicht no de sozialen Encadrement, esou wéi dat an deene richtege Beschäftigungsinitiativen ass, net garantéiert ass.

Zweetens si meng Bedenken an deem...

(*Interruption*)

Wëllt Der mer eppes soen, Här Kaes?

(*Interruption*)

Gelif?

» **M. le Président**.- Här Jaerling, erlaabt Der eng Zwëschefro vum honorabelen Här Glesener?

» **M. Marcel Glesener** (CSV).- Mä, wann den Här Jaerling seet, déi richteg Beschäftigungsinitiativen...

» **M. Aly Jaerling** (*Indépendant*).- Ma déi falsch, déi kreéiere mer elo.

» **M. Marcel Glesener** (CSV).- Ah sou, Merci.

» **M. le Président**.- Wéi war Är Fro, Här Glesener?

» **M. Marcel Glesener** (CSV).- Ech hunn d'Äntwert kritt.

déi definitiv an där heiter Situatioun elo wäerten hänke bleiwen, an da gëtt dat ee vun deene gréisste Betriben, déi mer hei wäerten am Land hunn, wou dann eben déi Leit soen, ma elo hunn ech eng garantéiert Aarbechtsplaz, ech brauch net méi um éischten Aarbechtsmaart ze sichen, fir do wahrscheinlech och nach net méi ze verdénge wéi hei.

Dat ass eng Realitéit, an et ass och wéinst deem Punkt, wou mir eis bei dësem Gesetz wäerten enthalen.

En zweete Punkt, Här President, deem haut de Mëtteg hei ugeschnidde ginn ass, deem huet wuel näischt direkt mam Projet ze dinne, mä de Projet ass awer eng Konsequenz vun deem; dat ass de Fonctionnement vun der ADEM. A wann ech elo zrëckkucken, wéi dacks dass mir heibanne schonn iwwert d'ADEM geschwat hunn, da brauch een net méi haut hinzegoen an nach eng Kéier opzezielen, wat d'Positioun vun den eenzelne Parteien ass, wat do misst reforméiert ginn.

Dat Eenzegt, wat een haut ka feststellen, ass, dass quasi jiddwereen heibannen elo eng Reform vun der ADEM verlaangt. A wann een da weess, dass mer awer elo un d'Enn komme vun där Regierung hei an dass mer dee Projet nach net hei kënnen an enger Chambersdebatt stëmmen, da muss een awer zumindest kënnen hei dem Aarbechtsminister de Virwurf maachen, dass hie seng Aarbecht do net gemaach huet. D'ganzt Land schwätzt elo scho jorelaang iwwert déi Reform. Elo geet déi Regierungsperiod hei zu Enn a mir hunn dee Problem net geléist! Et ass e Problem, dee laang bekannt ass.

A wann et schonn esou wäit geet, Här President, dass ee vun de Kolleegen aus de Majoritéitsparteien de Mëtteg quasi um Radio d'Demissioun vun der Direktesch vum Arbeitsamt verlaangt huet, da geet dat jo awer ganz wäit, an da géif ech mengen, dass awer spéitstens elo den Här Aarbechtsminister gefuerdert ass. Hien ass awer elo gefuerdert, fir dorauser déi Konklusiounen a Konsequenzen ze zéien, déi verlaangt ginn. Well wann den Här Aarbechtsminister dat doten esou weiderlafe léisst, komme keng Konsequenzen, komme keng Reaktiounen, dann zielt dat aalt Spréchwuert „mitgegangen, mitgefangen, mitgehangen“.

(*Hilarité*)

An dat zielt dann an dësem Fall net nëmme fir d'Direktesch vum Arbeitsamt, mä dann och nach fir den Aarbechtsminister selwer.

Dat wëllt natierlech keen, an duerfir wiere mer frou, wa géife ganz séier hei Neel mat Käpp gemaach ginn, well wa mer d'Aarbechtsamt richtig un d'Fonctionnéiere kréien, da ginn déi heite Strukture manner gebraucht. An deem Sënn ass schonn d'Reform...

(*Interruption*)

Dach, dach! Wann d'Arbeitsamt richtig fonctionnéiert, da kréie se och déi dote Leit placéiert. Mä mir wëssen allegueren...

» **M. François Biltgen**, *Ministre du Travail et de l'Emploi*.- Neen!

» **M. Gast Gibéryen** (*ADR*).- Jo, dat sot Dir! Am Ausland kréie se där och placéiert. Do gëtt et aner Systemer am Arbeitsamt wéi dat hei zu Lëtzebuerg ass. Et kann een net einfach higoen, Här Aarbechtsminister, a soen, dat geet net esou an duerfir... Dat ass net esou! Gitt emol an d'Ausland, oder Dir waart jo bestëmmt och an d'Ausland kucken, do gëtt et aner Mechanismen,...

(*Brouhaha général*)

...wéi d'Leit placéiert ginn, a wa mer eis heibannen eens sinn, a mer sinn eis jo quasi eens, dass d'ADEM net richtig fonctionnéiert, da kommt elo net heihinner a sot, wann d'ADEM besser géif fonctionnéieren, géifen net méi Leit placéiert ginn.

» **M. le Président**.- Här Gibéryen!

» **M. Gast Gibéryen** (*ADR*).- Hei ass d'Politik gefuerdert an hei ass un alleréischter Stell den Aarbechtsminister gefuerdert, an deem huet an dëser Fro bis haut versot. Dat gesot, Här President, wëll ech soen, dass mir eis zu dësem Projet wäerten enthalen.

» **Une voix**.- Dat ass eng richtig sozial Astellung!

» **Une autre voix**.- Très bien!

(*Brouhaha*)

» **M. le Président**.- Här Gibéryen, Är Interventiuon ass eriwwer. Den Här Jaerling huet elo d'Wuert.

» **Une voix**.- Gott sei Dank ass net jidd-

» **M. François Biltgen**, *Ministre du Travail et de l'Emploi*.- Et ass ganz einfach den Ureiz; d'Madame Loschetter hat et virdru gesot. Déi Leit, déi definitiv agestallt sinn, déi ginn op d'mannst vum Stat rembourséiert, nëmmen zur Héicht vum Mindestloun.

» **M. Gast Gibéryen** (*ADR*).- Jo.

» **M. François Biltgen**, *Ministre du Travail et de l'Emploi*.- Dat heescht, Dir kënnt elo net soen, dat si Statsaarbechter. Déi hu kee Kollektivvertrag an näischt. Wann déi eng aner Schaff ugebuede kréien, wou se kënne méi verdéngen, ass schonn den Ureiz do, dass se dohinner ginn. Dat ass de Prinzip, wéi et soll fonctionnéieren.

» **M. Gast Gibéryen** (*ADR*).- Mir wësse jo awer et alleguer, dass déi weinegst vun deene Leit, déi esou schwéier ze placéiere sinn, wäerten eng Plaz am Privatsacteur kréien, wou se nach solle méi verdénge wéi de Mindestloun.

(*Interruptions*)

Mä meng Fro ass awer nach ëmmer berechtegt: Wann déi Leit dann elo eng Schaff am Privatsacteur ugebuede kréien, de Mindestloun kréien oder och nach eppes Klenges iwwert de Mindestloun an déi soen, ma ech bliwen awer léiwer hei an där A.s.b.l. an ech ginn net dohinner, wat maache mer dann? Da si mer am Aarbechtsrecht an da musse mer deene Leit kënnegen.

A wat huele mer dann als Motiv, fir hinnen ze kënnegen? Well et kann ee jo net als Motiv wahrscheinlech uginn, dass ee seet, ma déi Leit hu jo dobaussen eng aner Plaz, déi se kënne kréien, an duerfir kënnege mir hinnen. Ech ka mer net virstellen, dass dat am Aarbechtsrecht géif akzeptéiert ginn.

Duerfir, soen ech, wäerte mer hei eng ganz Partie Leit hunn, déi soen, ech bliwen elo hei an deenen Initiativen an ech bleiwe mä Liewe laang an deenen Initiativen, well se da soen, dann hunn ech eng Plaz, déi garantéiert ass, mäi Gehalt ass garantéiert. An da sinn et, ob mer wëllen oder net, quasi Statsaarbechter, well se iwwert de Stat an der Héicht vum Mindestloun finanzéiert ginn, iwwert d'A.s.b.l.

Dat kënnt Der kucke wéi Der wëllt, mä mir wäerte gesinn, wa mer an e puer Joer d'Bilanz zéien, wäert dat heiten eng vun deene gréissten Entreprises am Land ginn. Mir wollten dat just hei mat an d'Diskussioun erabréngen an dorobber opmierksam maachen.

» **M. François Biltgen**, *Ministre du Travail et de l'Emploi*.- Ech hu léiwer, dat si grouss Entreprises...

(*Interruption*)

» **M. Gast Gibéryen** (*ADR*).- Gelif? Wat sot Der? Ech hunn net matkritt...

» **M. François Biltgen**, *Ministre du Travail et de l'Emploi*.- Entschëllegt! Ech hu léiwer, d'Beschäftigungsinitiative si grouss Employeuren, wou d'Leit richtig schaffen, wéi de Fonds pour l'emploi, wou d'Leit just Sue kréien am Chômage, ass dee gréissten Employeur. Well zurzäit ass de Fonds pour l'emploi de gréissten Employeur am Land an dat ass net gutt.

» **M. Gast Gibéryen** (*ADR*).- An nach léiwer misst Der hunn, Här Aarbechtsminister, dass d'Leit um éischten Aarbechtsmaart beschäftegt wieren, wéi an enger Beschäftigungsinitiativ oder um Fonds pour l'emploi.

(*Brouhaha*)

» **M. François Biltgen**, *Ministre du Travail et de l'Emploi*.- Jo, natierlech, Här Gibéryen! Mä wann ech de Choix net hunn?

» **M. Gast Gibéryen** (*ADR*).- Maja, et ass jo dat, wat ech soen!

» **M. François Biltgen**, *Ministre du Travail et de l'Emploi*.- Dir loosst se léiwer am Chômage.

» **M. Gast Gibéryen** (*ADR*).- Neen, neen, mir loosse se net léiwer am Chômage. Mir hätte gären, dass den Ureiz fir an den éischten Aarbechtsmaart bestoe bleift. An hei gëtt et keen Ureiz méi fir an den éischten Aarbechtsmaart ze kommen. Déi Leit hei soen, ma elo hunn ech eng garantéiert Plaz, ech hunn eng garantéiert Pai. Firwat soll ech elo kucken, fir um éischten Aarbechtsmaart nach eng Plaz ze fannen?

Dat ass de wesentleche Problem, dee mir an dësem Projet gesinn. Duerfir soen ech, mir kënnen an engem Joer oder an zwee Joer eng Kéier Analyse maachen, oder Dir wäert se selwer maachen. Da wäert Der feststellen, dass mer ëmmer méi Leit kréien,



Dammen an Dir Hären, ech wëll elo emol fir d'éischt dem Rapporteur Merci soe fir säin ausféierleche Bericht, an deem iwwregens scho ganz vill Froe beäntwert waren, déi herno hei gestallt gi sinn. Duerfir wëll ech och net méi dorop zrëckkommen.

Ech wëll dräi kuerz Iwwerleeunge maachen. Dat éischt ass de Problem vum Chômage am sougenannten industriellen Zäitalter par rapport zum postindustriellen Zäitalter, dat mer eben zënter op d'mannst 25 Joer kennen. Am industriellen Zäitalter hate mer praktesch nëmme Chômage conjoncturel, da jo och Plein emploi, a kee Chômage structurel. Deen hate mer, well iwwert d'Halschecht vun de Leit iwwerhaapt keng Qualifikatioun gebraucht hunn.

Dat heescht, wat ass da geschitt?

Majo, do konnt eng Verwaltung zwou Saache maachen, nämlech de Chômage verwalten an deem Sënn, dass d'Leit Sue kritt hunn. Dat war nach d'Philosophie vun der Reform vun dem Aarbechtsamt 1976, fir ze soen, mir ginn hinne Suen, an duerno geet et erëm eng Kéier besser, da fanne se vum selwen erëm eng nei Plaz, a mat de Suen ass et iwwerbréckt. Dat huet deemools fonctionnéiert a fonctionnéiert haut net méi.

A wat deemools fonctionnéiert huet, nämlech, dass en Aarbechtsamt zweetens gekuckt huet, wou se Leit géife sichen, wou Plaze sinn, déi geschaf ginn, an déi eng bei déi aner geschéckt huet, dat geet einfach net méi an enger postindustrieller Gesellschaft, well d'Leit haut op allen Aarbechtsplaze Qualifikatioun brauchen, déi ëmmer verschidde sinn, well soss wär et jo duergaangen an där leschter Zäit, dass nei Aarbechtsplaze geschaf goufen. Mir hu méi Aarbechtsplazen zu Lëtzebuerg, wéi mer Lëtzebuerger hunn. Dat wär an deem Fall duergaangen, fir dass d'Leit och all eng Schaff hätten. Mir hunn e Chômage structurel.

Elo kréie mer Chômage conjoncturel derbäi. An déi grouss Gefor ass, dass, wa mer net elo oppassen, mer herno no dem Chômage conjoncturel erëm méi Chômage structurel kréien. Dat ass déi grouss Fro.

An duerfir kann och d'Administration de l'Emploi net méi als Verwaltung fonctionnéieren. Si kann net de Chômage verwalten, si kann d'Aarbechtslosegeld verwalten, si kann all déi aner Sue verwalten, mä si muss Kär ginn - an dorobber kommen ech herno zrëck - vun enger aktiver Beschäftigungspolitik.

Dat heescht, d'Administration de l'Emploi kann och net alles maachen, an duerfir bleiwen ech der Meenung, dass ee soll op de Wee vun engem Établissement public goen. Mir maachen dat elo net, well mer elo séier e Projet de loi maachen, duerch dee mer esou vill wéi méiglech Flexibilitéit mat erabrénge, mä ech mengen, dass een duerno muss weiderdenken. Mä elo maache mer dee kleng Projet de loi, mat deem iwwregens och déi Fro vun der Direktioun ugepaakt gëtt. De John Castegnaro huet de Mëtteg op enger anerer Plaz vun der Direction collégiale geschwat, dat ass eng Iddi, wéi ech och selwer gesot hunn, déi eis virschwieft.

Et muss ee just wëssen an deene Leit soen, déi elo verlaangen, dass de Minister géif Leit auswiesselen, dass mer e Statut de la Fonction publique hunn, dass et siwe Joer gedauert huet, bis an dëser Chamber e Gesetz gestëmmt gouf, wat seet fir d'Zukunft, dass ee kann e Verwaltungs-direkter no siwe Joer auswiesselen. Dat zielt eréischt fir d'Zukunft. Och dat wëll ech einfach hei gesot hunn.

Fir de Rescht ass et kloer, dass d'Aarbechtsamt - an ech kommen op seng Roll zrëck - eng Roll ze spillen huet an dass mer natierlech - nieft deem, wat d'Aarbechtsamt elo selwer reforméiert huet - an enger Partie Artikelen d'Flexibilitéit erabrénge an deem neie Projet de loi, dee mer amgaange si mat der Fonction publique fäerdeg ze maachen, fir esou vill wéi méiglech de Fonction-publique-Statut ze respektéieren.

Zweet Iwwerleeung: d'Économie solidaire a Beschäftigungsinitiativen. Do gëtt et dräi Ënnerscheeder. Deen éischten ass deen: Bei der Économie solidaire ass den Träger extrem wichteg. Träger ass zum Beispill, wa

mer vu Société commerciale schwätzen, eng Coopérative oder eng A.s.b.l. oder virun allem de Bénévolat, wat mer iwwregens erëmfannen an de Beschäftigungsinitiativen. Do gëtt et Saachen, déi sech iwwerschneiden.

Zweet Saach ass allerdéngs - an do ass schonn e groussen Ënnerscheed par rapport zu de Beschäftigungsinitiativen: D'Économie solidaire, déi ass tëschent dem private Secteur an dem Statsssecteur, dat heescht d'Économie solidaire dierf och net finanziell just hir Sue vum Stat kréien. An dat ass e grouss Problem. Beschäftigungs-initiative fonctionnéiere ganz staark nëmme mat de Sue vum Stat.

An da kommen ech op den drëtten Punkt, well dat ass d'Ursaach dervun: D'Économie solidaire ass do, fir iwwerhaapt och Déngschtleeschungen a Produkter unzébidden. Dat ass d'Haaptaufgab vun der Économie solidaire. D'Beschäftigung vu Leit, déi wäit ewech si vum Aarbechtsmaart, ass en Nieweprodukt.

Bei de Beschäftigungsinitiativen ass et ëmgedréint. Do ass d'Beschäftigung vu Leit d'Haaptprodukt, an duerfir kréie se och esou vill Sue vum Stat, an d'Ubiddung vun interessanten, neie sozial an ökologesch interessante Produkter an Déngschtleeschungen ass d'Nieweprodukt.

Duerfir sinn déi zwee matenee verknäppt, mä et muss ee se auserneenhalen, an dat erkläert dann natierlech och - an do kommen ech op eng drëtt Iwwerleeung hei -, woufir mer hei op de Wee ginn, dass mer net méi wéi virdru soen: „Dir kritt bis zu 75% vun engem Projet.“, mä soen: „Mir bezuele Beschäftigungsinitiativen opgrond vun der Produktivitéit vun deene Leit, déi Dir astellt.“

Selbstverständlech muss mer lech iwwert déi Konventioun dann och en Encadrement bezuelen, fir dass Der lech eben ëm déi Leit bekëmmert. Op déi Konventioun kommen ech nach zrëck wéinst dem Här Jaerling. Déi huet den Här Jaerling net am Text gelies, well soss hätt en déi Fro net gestallt.

Meng drëtt Iwwerleeung ass déi, dass mer mussen kucken, wat fir eng Bevëlkerung mer hunn an der Administration de l'Emploi. D'Chiffere si virdru genannt gi vun deene berühmte Kategorien A, B, C, D an E. Nëmmen an Drëttel vun de Leit, déi beim Aarbechtsamt ageschriwwen sinn, si Leit, déi direkt ze vermëttelen sinn.

Et ass duerfir, dass ech virdru gesot hunn: Et ass net d'Reform vum Aarbechtsamt, déi dat heiten erméiglecht. D'Reform vum Aarbechtsamt ass wichteg, fir dass méi effikass a méi séier geschafft gëtt, mä d'Beschäftigungsinitiative bleiwe bestoen, well et gëtt keng Aarbechtsplazen, déi geschaaft ginn duerch eng Reform vum Aarbechtsamt. D'Aarbechtsamt muss kënnen méi effikass schaffen, mä Aarbechtsplaze mussen mer och nach hunn, a fir eng Kategorie Leit hu mer einfach keng Aarbechtsplazen. Dat ass de grouss Punkt, deen hei spilt.

Mir hu mam 5611 eng éischt Etapp gemaach. Mir hunn eng Etapp gemaach fir déi Leit, déi iwwer eng relativ kuerz Formation kënnen op den éischten Aarbechtsmaart kommen. Dat ass de 5611. Dat huet bei der Jugend zimlech gegräff.

Mä mir hunn awer zwee Drëttel vun de Leit - net grad elo, wann ech déi doten ewechhuelen -, mä mir hunn dann awer nach iwwert d'Halschecht vun de Leit, deene mer net kënnen hëllefen iwwer eng Convention d'activation, deene mer net kënnen hëllefen iwwer CIEen, CAEen.

Mir hunn eleng 15% - elo huele mer emol eng Ziffer - vun de Leit, déi am Aarbechtsamt ageschriwwen sinn, déi portugisesch Matbierger sinn, déi praktesch all nëmmen d'Primärschoul a Portugal gemaach hunn, also héchstens Portugisesch schwätzen an oft emol net richteg schreiwe kënnen, an dovunner ass och nach bal d'Halschecht iwwer 50 Joer al.

An do soen ech, dass all Reform vum Aarbechtsamt deene Leit keng Schaff ka verschafen. Et sinn awer Leit, ëm déi mer eis awer mussen Suerge maachen. An dat sinn der relativ vill, dat doten. Do kann ee soen am Aarbechtsamt - an dat geschitt och schonn um Aarbechtsamt -, dass de Kontrakt iwwersat gëtt op Portugisesch, mä domadder hu mer se nach net op eng Plaz geschéckt, well do mussen se vläicht och aner Sproochen kënnen. Dat kann een, an elo kommen ech op d'Beschäftigungsinitiativen zrëck, net maachen doriwwer, dass een d'Leit placéiert, assignéiert, mä do brauche mer nëmmen d'Beschäftigungsinitiativen. Et sinn och vill sozial Initiativen, mat deene mir och zesummeschaffen, mä do kënnen mer se nëmmen iwwert d'Beschäftigungs-initiative méi laang halen.

De Prinzip soll bleiwen zwee Joer. An zwee Joer kann ee ganz vill mat de Leit schaffen. Déi kommen also no deenen, déi mer kënnen an de CIE, CAE schécken, wat manner wéi ee Joer ass. An déi, déi wierklech no zwee Joer da keng Chance hunn, iergendwou hinzekommen, déi kréien en definitive Kontrakt mat der Beschäftigungsinitiative.

Dat maache mer och haut schonn. D'Beschäftigungsinitiative schécke regelméisseg Dossieren eran, wou hire Service éducatif et social schreift: Majo, mir hunn dat an dat mat deem Mann oder där Fra gemaach a mer fanne keng Plaz fir se; kënnen mer se net méi laang halen, kann de Minister keng Exceptioun maachen? De Minister gëtt dann den Dossier weider un d'Aarbechtsamt a wann d'Aarbechtsamt seet, jo, effektiv, deen ass soss net ze placéieren, da kann deen och elo haut schonn do bleiwen.

Dat geschitt net oft, wëll ech soen, a meeschtens accordéiere mer dat och, esou dass och d'Beschäftigungsinitiativen iwwerhaapt net hei versichen, fir massiv Leit éiweg ze halen. Mä et ass awer wichteg, dass déi Leit eng Perspektiv hunn, fir eng Schaff ze hunn. Dat ass och fir de Stat vill méi bëlle, wéi wann déi Leit entweder am Chômage oder am RMG oder a soss iergendengem soziale Lach géife leien. Hei kréie si eng Pai, si bezuele Cotisations sociales an deelweis, wéi et ass, bezuele se Steieren, well een, och wann ee Jonggesell ass, um Mindestloun Steiere bezilt. Alles dat ass also fir eis méi wichteg.

Elo ass sech d'Fro ze stellen, ob dann elo Ureizer do sinn, fir op den éischten Aarbechtsmaart ze goen. Majo, wann een do méi verdénkt, da geet een op den éischten Aarbechtsmaart. Wësst Der, schwätzt emol mat Leit, déi just de Mindestloun hunn. Duerfir war ech vläicht virdun e bëssen ze vill opgereggt, mä et muss een emol kucken, wat fir eng Spréng ee mam Mindestloun mécht. Dat si 1.640 Euro. Domadder mécht een net vill Spréng. Ech mengen, wann een da wierklech erëm erauskënnt an et kritt een eng besser Plaz, da geet een och dohinner.

An nach eng Kéier: Déi Leit, déi iwwerhaapt an en definitive Kontrakt kommen, si wierklech déi, wou mer näischt aneschtens konnte maachen.

E Wuert zur Konventioun. Egal wat d'Forme juridique ass, müssen déi Leit eng Konventioun mam Aarbechtsminister maachen. Do kommen och erëm Kontrollméiglechkeeten eran. Et ass net esou, dass déi einfach Sue kréien a Leit. Do komme Kontrollméiglechkeeten derbäi.

E lescht Wuert. Den Här Krieps hat gesot, et wär keng Fiche financière do. Déi ass selbstverständlech derbäi - beim ursprüngeleche Projet. Déi Fiche financière ass derbäi an ass ganz detailléiert a seet, dass mer rechnen mat engem Surcoût vu 25 Milliounen Euro, dat heescht 30 Milliounen, mä do sinn esou vill Leit, bei deene mer iwwert den RMG dann emol rembourséiert ginn. Dat heescht, fir de Fonds pour l'emploi eleng wär et e Surcoût vu 25 Milliounen Euro.

Woubäi ech awer nach eng Kéier soen: Och dat ass eng Prévisioun, déi mer dee Moment gemaach hunn.

Wann et elo géif méi schlecht goen a wann de Chômage structurel géif an d'Luucht goen, da sinn natierlech d'Beschäftigungsinitiativen och wichteg. Ech fannen et nämlech definitiv besser, mir bidden de Leit, déi keng Chance hunn eng Schaff ze kréien, d'Méiglechkeet ze schaffen, hir Suen ze verdéngen, owes heemzergoen an an de Spigel ze kucken an ze soen: „Ech hu meng Sue selwer verdéngt.“ Dat ass besser fir d'Leit a besser fir eis Gesellschaft. An duerfir wär ech frou, wann dëse Projet géif eng grouss Majoritéit fannen.

Ech soen lech Merci.

» **Plusieurs voix.** - Très bien!

» **M. le Président.** - Merci, Här Minister. Dir Dammen an Dir Hären, mir kommen dann zum Vote vum Projet de loi.

**Vote sur l'ensemble du projet de loi et dispense du second vote constitutionnel**

Här Minister, de Projet de loi 5144 ass ugeholl mat 56 Jo-Stëmmen, bei véier Abstentionen.

*Ont voté oui: Mmes Sylvie Andrich-Duval, Nancy Arendt, M. Lucien Clement (par M. Laurent Mosar), Mmes Christine Doerner (par Mme Martine Stein-Mergen), Marie-Josée Frank, Marie-Thérèse Gantenbein-Koullen, MM. Marcel Glesener, Norbert Hauptert, Mme Françoise Hetto-Gaasch, MM. Ali Kaes, Paul-Henri Meyers, Laurent Mosar, Marcel Oberweis, Gilles Roth, Patrick Santer, Marcel Sauber, Jean-Paul*

*Schaaf, Marco Schank, Marc Spautz, Mme Martine Stein-Mergen, MM. Fred Sunnen, Lucien Thiel, Lucien Weiler et Michel Wolter;*

*MM. Marc Angel (par Mme Claudia Dall'Agnol), Alex Bodry, John Castegnaro, Mme Claudia Dall'Agnol, M. Fernand Diederich, Mme Lydie Err, MM. Ben Fayot, Jean-Pierre Klein, Mme Lydia Mutsch, MM. Roger Negri, Jos Scheuer, Romain Schneider, Roland Schreiner et Mme Vera Spautz;*

*MM. Eugène Berger, Xavier Bettel (par M. Carlo Wagner), Mme Anne Brasseur (par M. Fernand Etgen), M. Fernand Etgen, Mme Colette Flesch (par M. Charles Goerens), MM. Charles Goerens, Paul Helminger (par M. Alexandre Krieps), Alexandre Krieps, Claude Meisch (par M. Eugène Berger) et Carlo Wagner;*

*MM. Claude Adam, François Bausch (par M. Félix Braz), Félix Braz, Camille Gira (par Mme Viviane Loschetter), Jean Huss, Henri Kox (par M. Claude Adam) et Mme Viviane Loschetter;*

*M. Aly Jaerling.*

*Se sont abstenus: MM. Gast Gibéryen, Jacques-Yves Henckes, Jean-Pierre Koepf et Robert Mehlen.*

Gëtt d'Chamber d'Dispens vum zweete Vote constitutionnel?

**(Assentiment)**

Et ass also esou decidéiert.

Dir Dammen an Dir Hären, mir kommen dann zum nächste Punkt vun eisem Ordre du jour. Dat ass d'Diskussioun vum Projet de loi 5973, eng Ofännerung vum Code du Travail. Et sinn ageschriwwen: den Här Etgen, den Här Castegnaro an d'Madame Loschetter. D'Wuert huet elo de Rapporteur vun dësem Projet de loi, den honorablen Här Spautz. Här Spautz, Dir sidd gebieden Äre Rapport virzedroen.

### 3. 5973 - Projet de loi

#### 1) portant modification de l'article L.511-12 du Code du Travail

#### 2) dérogeant, pour l'année 2009, aux dispositions des articles L.511-5, L.511-7 et L.511-12 du Code du Travail

**Rapport de la Commission du Travail et de l'Emploi**

» **M. Marc Spautz (CSV), rapporteur.** - Här President, Kolleeginnen a Kolleegen, de Projet, mat deem mer eis elo beschäftegen, ass een, dee ganz kuerzfristeg vun der Regierung agereecht gi war an deen och zimlech séier, wa mer haut hei d'Zoustëmmung kréien, wäert evakuéiert ginn.

Den Ursprung vun der Kuerzaarbecht iwwert d'Gesetzgebung vum Chômage partiel geet zrëck op d'Krisejoren 1974-1979. Konkret gouf de Chômage partiel fir konjunkturell Froen 1975 agefouert, an zwar den 29. Juli 1975 op engem Dënschdeg hei an der Chamber.

Deemools huet de Chômage partiel fir d'Joren 1975-1976, de Chômage conjoncturel, de Fonds pour l'emploi 40 Milliounen Lëtzebuerger Frang kascht.

De strukturelle Chômage partiel ass agefouert ginn den 21. Dezember 1977, wou d'Chamber dozou gréng Luucht ginn huet. Dat war am Kontext vun enger Reform vum Arbeitsamt, dat 1921 geschaaft gi war, a wou 1972 e Projet de loi vun der Regierung komm ass a wou do déi Reform gestëmmt ginn ass.

De Chômage partiel ass e Mëttel, fir Aarbechtsplazen ze erhalen. Awer et dierf een net vergiessen: D'Leit loosse domadder Geld hänken. All Schichtaarbechter an all déi aner, déi verléieren hir Nuetszouschléi, hir Sonndeszouschléi, an et ginn nëmmen 80% bezuelt. Also ass et heiansdo fir déi eng oder déi aner Leit relativ schwéier, obwuel et eng Hëllef ass, fir awer iwwert d'Ronnen ze kommen, well et awer e groussen Akommensverloscht bei deene Leit ausmécht.

Mir ënnerscheede bei der Kuerzaarbecht e puer Aarten: de strukturellen, de konjunkturellen, dee vun der wirtschaftlecher Ofhängegkeet - dat ass zum Beispill, wann et iergendwou gebrannt huet an doduerch anerer net méi kënnen schaffen - oder de Cas de force majeure - dee virun allem gespiilt huet, wéi deemools a Frankräich de Streik war vun den Transporteuren an Zouliwwerer hiert Material net konnte